

# KAYUKILO

...pa kutanga kwa Kyambo. Mambo a kupwila kwapelako, ene mambo o Naipwizha mba mwimane...Inge baimba *Akyu Kiyukilo kya Kabaangabanga-Kalezhima*, mwaimana. Kechi ibyonyi? [Kipwilo kyaamba mba, “Ee.”—Waku.] Nanchi kika kyakubula kwi kyubila ku Kyambo kya Lesa? Ke mushingi. Pano mu Buuku wa Kulupuka, kyapitala kyabu 12, kutatwila pa veeleshi wabu 12, Nasaka kutanga kibese kya Kinembelo, wabu 12 ne veeleshi wabu 13.

*Mambo Amiwa sakupita muntanda ya Ijipita bufuku buno, kabiji nsakupuma...babeji bonse mu ntanda ya—ya Ijipita, kubonse bantu ne banyakama; kabiji...kapana luzhachisho: Amiwa yami NKAMBO.*

*Kabiji mashi akekala kwi anweba ke kayukilo ka pa nzubo yo mujimo; kabiji byo Nkamona mashi, Amiwa nkemupitaila, kabiji mwalo kechi ukemonona ne, byo Nkampuma ntanda ya Ijipita.*

<sup>2</sup> Mutwe wami ke: *Kayukilo*.

<sup>3</sup> Twayai pano tukunyike mitwe yetu. Kabiji mu kuzhindama Kwanji kwa pa kino kimye, byo tukyangye kufwenya kwipi kwi Aye mu milombelo ne, kujipo kyakukabila kyo mwakonsha kutemwa Lesa amba akumbule mabaanga ano nyi? Sutulai maboko enu inge muji nakyo, kabiji langulukai ku muchima wenu kyo mukeba mba Aye obe. Kuji konse mu kishimikwa, langulukaitu kyo mukeba mba Aye emubilekyo.

<sup>4</sup> Taata Wetu Wamwiulu, Anweba yenu Lesa ubula kwaluka, kabiji twalomba mba Anweba musakukumbula ku milombelo yetu, uno mute, nobe—nobe byo tubena kukwata maboko etu. Kabiji Anweba mwamona maboko ami asutulwa peulu, ne awo. Kabiji kukabila kwami, Nsakwikuyukisha ku bonse, ko kuba mba, Nkambo, Anweba musakubuka muntu yense uji muno leelo, mpulushai yense walubilamo. Pano, Anweba mwaambile mba, “Inge mwaipuzha Bataata kiji kyonse, mu Jizhina Jami, Amiwa ke kyuba.” Pano, Nkambo, tukwashai bonse pamo kuketekela nobe jibumba jimo ja bantu, ja baana benu baketekela. Ambai kupichila mu Kyambo Kyenu, Nkambo. Kyambo Kyenu bo Bukine. Peshai michima yetu.

<sup>5</sup> Twimusachila Anweba pa iye mpwijilo. Twimusachila Anweba pa Mulongo Grant, kabiji ne bonse ba mingilo yanji, kabiji ne bipwilo byonse ne bantu. Kabiji pa byonse byo Mwitubila atweba, Nkambo, twasata kwi Anweba. Taata, muji bavula muno bakabula kwi monapo jibiji ne, poso twamonang’ana ku lubaji lukwabo. Kuno kwakonsha kwikala kupwila kwapelako ko twaikala pamo pa ino ntanda. Lekai

Mupashi Wazhila eye na kwitupesha kyapamo, wamwingilo wa ku byakubila byetu. Mu Jizhina ja Yesu twalomba. Amena.

Ikalaiko.

<sup>6</sup> Amiwa njina kipepala kicheche kya byambo papo, Amiwa na nemba Binembelo bimo bicheche ne bintu bicheche. Byo naubanga kala Nakonsha kwi kiketekela mu milanguluko yami, bino Napitatu pa tweeti-faivi, mwayukatu, ko kuuba mba, kimye kya bubiji. Kabiji Amiwa kechi mbena kuvuluka byo Naubanga kala ne, kabiji ne kukaswa kwabaya mu kupwila ne bintutu, kabiji ne byakuba byavula.

<sup>7</sup> Mutwe wetu mute uno ke: *Kayukilo*. Kikope kyetu kyanshikukila mu Ijipita. Ke kipikichala kikatampe bingi papo, Nasaka anweba bonse mba mwikimone kabiji mwikaletu na munema monka mo kyakonshekela. Ijipita ke kifulo pa mwekela bibye, kabiji ne kimye bibye ke ponka pa kutatula kwa kulupuka.

<sup>8</sup> Kabiji, pano, ke kipasha kyaleelo, kyamweka, byo twatanwa mu kulupuka kukwabo. Lesa kulupula Isalela kufuma mu Ijipita, kuya mu ntanda ya mulaye, kyajinga kipasha kya Kilishitu kulupula Musongwa kufuma mu kipwilo, kuya ku Ntanda yamulaye. Atweba tuji mu kulupuka kukwabo. Pano inge mwakonsha kutanga Byanembwa, tujitu na kimye kyakutanga pabishina pabishina, akyo kyakine. Atweba twi... Byonka Lesa byo alupwile kyaalo kufuma mu kyaalo, Lesa ukalupula Musongwa kufuma mu kipwilo. Aye Musongwa uketwa kufuma mu bipwilo byonse. Kikekala ke basalululwa na Lesa, bo bakalupulwamo. Kabiji twafika pamupaka wakulupuka ponkapano, mambo tuji na binshinino Byanembwa bya kuuba mba twaimana ponka. Bino, Nayuka mba akyo kyaambiwa bimye byavula bingi, bino, mulunda nami, kimye kimo kikambiwa kimye kyapelako. Kimye kikatwela mu Peenape mu kyokya kimye. Aye ubena kwiya mu kusenda Musongwa kufuma mu kipwilo.

<sup>9</sup> Akyu kiyukilo kyo kyalengejile pekale lupusano pakachi ka Ijipita ne Isalela, aby ayaalo bibiji. Bonse bajinga bantu, bonse balengelwe-kwi Lesa, bonse bajinga mingilo ya ku kuboko kwa Lesa, bino, lupusano lwajingapo kimye kyaluzhachisho lwa lufu, lupusano pakachi ka bumi ne lufu kyajinga kiyukilo.

<sup>10</sup> Kabiji nanchi byobyo kikekala ne pakwiya kwa Mwaana wakwa Lesa, kimye Aye kyo akafumyamo Musongwa mu kipwilo, lupusano lukekala ke Kiyukilo. Pano, telekai bulongo uno mute, kabiji mumone kana kechi kyakine ne. Akyu Kiyukilo kikekala ke lupusano. Kwafwainwa kwikala lupusano.

<sup>11</sup> Lesa ukazhachisha ntanda yonse, juba jimo. Inge Naipuzha bantu ba ku Katolika mba, "Ing'anyi Ye ukebachibila mambo, Aye ukachibila mambo ntanda naka?" Bakonsha kwamba mba, "Kipwilo." Kipwilo ka? "Akyu kipwilo kya Katolika." Ing'anyi

kipwilo kya Katolika? Kuji bavula bingi. Abo ba Methodist bakonsha kwamba mba, "Naba Methodist," ba Baptist nanchi bafumamo. Nanchi, inge mwiichibila mambo na kipwilo kya Baptist, bonse bashala bafumamo. Ba Pentekosito baamba mba, "Naba Pentekositi," nanchi byashala bafumamo. Monai, kwakonsha kwikala kivundakanya, ke kivundakanya kyabaya bingi, ke kivundakanya kyabaya bingi ku milanguluko, pa kulanguluka kyokyo kintu.

<sup>12</sup> Bino Lesa wajinga na jishinda Aye jo aambile mba Ukapingula ntanda, kechi na kipwilo kya Katolika ne, kechi ku kipwilo kya Polotesitati ne. Bino Aye ukapingula ntanda kupichila mwi Yesu Kilishitu, kabiji Yesu ye Kyambo, nanchi kyabwela ku Baibolo jibiji. Mwamona? Aye ukapingula ntanda na Baibolo. Kabiji Baibolo ye Buuku wa Lesa wa buchubishi bwa mambo, alo ke lumwekesho lwapwijijika lwa Yesu Kilishitu, kyakuuba mba kafwako kikwabo kyakubikako nangwa Kufumyako ne; akwa kuzhatwa kwa kwikyuuba, ke kufumyamo jizhina jenu mu Buuku wa Bumi. Ikalaitu monka mu Buuku, ne kulomba Lesa twikajike kulubaji lwa Kyokyo.

<sup>13</sup> Pano twatana kuuba mba, kayukilo, kayukilo kyo kika? Kayukilo ke kiyukilo kya kuuba mba mfweto yalipilwa, kayukilo byo kaji. Byonka biji ngyangi ya mashitima ne mikwakwa ya masakya, tutola mali etu kabiji twaya ku kitesheni. Pano, monai, mu mikwakwa ya masakya kechi byaswishiwa ne, mu mapuzha tuyukilo mo twingila, kechi baswisha kulipilisha mali ne. Kechi bakonsha kulipilisha mali ne, kanatu kayukilo; biji nobe, mandeke, ne bikwabotu. Umvwe mwaya kutu kumo, kifulo kya kupotelako, na kupota, kufuma mu mali enu, nanchi tuyukilo twavula, ako kayukilo kayuwe musango. Kabiji aka kayukilo ke kiyukilo kya kuuba mba malipilo obe alipilwa. Obewa uji na sambu ya kukajila bwato, ya kukajila ndeke, ya kukajila sakya, nangwa kyonse byokiji, kikulutu walama kayukilo ka kumwesha mba—mba kwenda koobe kwalipilwa. Pano vulukai kyokyo. Kechi mwilikubeko ne.

<sup>14</sup> Isalela mwanamukoko waji waipaiwa wajinga... wajinga kyo kyakebelenga Lesa. Yehoba wakebelenga mwanamukoko waipaiwa, wakupingishishamo wabula mambo. Nobe byo twapitamu mu mulungu wapwa, amba Lesa, inge Aye wafukula kintu kimo, Aye kechi upipula ne. Kabiji Aye walengele jishinda, kintu Kyanji kitanshi Aye kyo aubile muntu byo aponene, Aye wamulengejile jishinda ja kubwelelamo, inge Aye wakebelenga kumukula, kabiji Aye wafukwile Kupulusha muntu na Mashi a Umo wabula mambo. Kabiji Aye myaka ne myaka waubatu kintu kimo. Aye kechi wackingyapo ne. Kechi pajipo kifulo Lesa kyo akakumenyapo mupopweshi ne, kanatu na Mashi. Akyo kyo kyoka kifulo Kyanji.

<sup>15</sup> Tumweseka Aye kwitukumanya mu sukuulu wa mamboawama, mu dinominesheni wetu, mu mutanchi

wakufunda kwetu. Bamo banshimika byamba kabiji bamo banshimika mizhi, Babilona kabiji—kabiji kyamba kya Babela, kabiji ne misango yonse ya bintu. Bino nangwa byonkabyo kishalatu byonkabya, Lesa aye ukumanyatu mupopweshi wakine pa Mashi. Aye kechi wackingya ne. Atweba bonse kechi twakonsha kwikala ba Methodist ne, atweba bonse kechi twakonsha kwikala ba Pentekosito ne, atweba bonse kechi twakonsha kwikala *bibye, byobya*, nangwa *bikwabo ne*, kechi tukaswang’ana ne. Bino umvwe Naiya ku muntu, nangwa ekale pulisiti wa ku Katolika nangwa musango yense ye ajimo, umvwe uji mushi ya Mashi atweba twi balongo, kechi mambo na po aji ne, kikulutu uji mushi ya oa Mashi.

<sup>16</sup> Pano, mwanamukoko waipaiwa ye wakebelwenga kwi Yehoba, kabiji ne mashi ajinga kayukilo ka kuuba mba mwinglelo waingijiwa. Lesa wiakebelenga kwikala a bukuhi, kufuma mu Ijipita, kuya ku ntanda ya mulaye, Aye wakebelenga nyama waipaiwa. Kabiji awa nyama wafwainwa kwikala na... Mashi a nyama wafwa afwainwa kubikwa pa jishiki ne pa kizhilo, kabiji akya kyaimejileko mba kayukilo Yehoba nkoakebelenga kafikizhiwa. Mwamona? Bino, kechi mwanamukoko ye wajinga kayukilo ne, mashi o ajinga kayukilo. Pano, bumi bwafumamo mu kitapisho, kabiji pano mashi ajinga kayukilo. Yanji mikambizho yafikizhiwa. Mashi aimejileko kayukilo, kiyukilo kya kuuba mba waitabila wauba monka mwajile kyakebewenga. Aka kajinga kayukilo. Kijitu bulongo, pakumona waitabila, wapopwela, nanchi wajinga wayukanyikwa na kitapisho kyanji. Mwamona?

<sup>17</sup> *Ino yo nzubo*, kabiji ne mupopweshi, kika kyakebelwenga? “Ipayai mwanamukoko. Pajuba jabu fotiini byo jabikilweko, aye—aye mulume wabula bulema, Isalela yense bakamwipaye, kabiji mashi bakeatola na sono ya isopi ne kubika pa jipulanga ja pa kibelo.”

<sup>18</sup> Kabiji, mwaila ndonda, awa isopi kyajingatu sono. *Isopi* kyalumbulula mba “lwitabilo lobe.” Muntu umo waeseka kwikala na lwitabilo lwakilapo, ao oene mambo kyo mubujila kutambula lubuko. Lwitabilo ke kintu kya kyapeelatu. Uji na lwitabilo lwa kwiya ku kipwilo. Obewa uji na lwitabilo lwa kwenda kuya kokwa. Uji na lwitabilo lwakutatula motoka obe. Uji na lwitabilo lwa kuja kajo nkobe ka mulajilo. Abyo byo kiji, ke lwitabilotu lwapeela. Pano pakushinga mashi, ashingilwe na isopi, ke nsono imenatu konsekonsi mu Palasitani, kibena kumwesha mba lwitabilo lwakushingako mashi kechi kintu kyakilapo kyakuuba mba wafwainwa kwikala na digili wabu dokotala pa kwikyuba ne. Ke lwapeelatu, lwitabilo lwa pa juba pa juba, lwa kwitabila Lesa. Mwamona? “Ingijishai mashi,” konka kulwitabilo, “na isopi.”

<sup>19</sup> Pano, mupopweshi, inge, wamweka pansi ya ao mashi, kyamwesha kuuba mba wauba mukambizho wakwa Yehoba,

kabiji wimwesheshe nao. Kayukilo kamwesheshe kuuba mba wimwesha ku lubaji lwa mwanamukoko waipaiwa ao Yehoba ye akambizhizhe. Mwingilo waingijilwe. Ke kipasha kyalumbuluka bingi buleelo, kya Kilishitu ne waitabila. Inge Kayukilo kamwekanyika ku waitabila, nishi Kyamwesha kuuba mba kyaitabilwa kabiji amba mwinglelo waubiwa.

<sup>20</sup> Nanchi, mashi ajinga kayukilo ka kuyukanyikilwamo, ao ene mashi. Nyama wasumine mashi, wafwile, kabiji mashi anji ajinga pa kibumbulu. Bino, bumi bwa nyama, abwa bwajinga mu mashi. Kabiji bumi buji mu mashi, twayuka kyokyo. Aye Baibolo byo aamba, kabiji sayaasi wikishiniikisha, bumi buji mu mashi. Nanchi onkao mambo nyama inge waipaiwa, kabiji ne bumi bwa onaika kufuma mu nyama, aa mashi ajinga ng'ingijilo ya mashi, a kwimenako kayukilo. Mambo, bumi bwajinga mu mashi kechi bwakonsheshe kubwela pa waitabila ne, mambo bwajinga bumi bwanyama.

<sup>21</sup> Kabiji bumi bwa nyama ne bumi bwa muntu byapusana bingi. Kechi mujipo ne, kafwako nangwa kimo kijimo ne. Mwatola, tolai mashi a nyama ne kubika mwi obewa, obewa ukafwa. Nanchi mwamona, atweba, ke—ke bumi bwapusananako na mashi a nyama kukila byo kiji mu mashi a muntu, mambo muntu uji na mweo. Nyama kechi uji na mweo ne.

<sup>22</sup> Kabiji pano, onkao mambo, ao ene mashi, kyumvwai pano, ng'ingijilo ya mashi achila, byamvwanga mashi, aimene ponka pakibelo, nobe kayukilo ka kuuba mb mwanamukoko wafwa, pano, mambo bumi bwa mwanamukoko kechi bwakonsha kubwela pa muntu mupopweshi ne. Bino leelo...Kyajingatu kipasha.

<sup>23</sup> Leelo kechi kuchila kwa Mashi a Nkambo Yesu ne, Mwanamukoko wetu, bino ke Bumi bwajinga mu Mashi, ao ye Mupashi Wazhila. Ubwela jibiji kabiji ko Kayukilo ko twaitaba ne kuubila monka Lesa mo etubujila mba tube. Kabiji pano, monka mukwikala na Kayukilo, atweba twayukanyikwa na Kitapisho kyetu. Kyalumbulukatu. Amiwa kechi namonapo kintu kikwabo kyakonsha kwikiletu patoka ne. Mwamona?

<sup>24</sup> Jishindatu jimo jakonsha kubulang'ana amba aye nzubo yakwa kananga, ne ayo, iji pansi ya mashi, mambo kuchila kwa mashi kwajinga pa kibelo. Wapichile mu, Malaika walufu watajile kabiji wamwene mashi. Bino, ne jikwabo, kyajinga kipasha kya Mupashi Wazhila.

<sup>25</sup> Pano, monai, ene Mashi akwa Yesu kechi akonsha kwiya pe atweba umo umo ne, mambo Aye wajinga na Mashi avula mu mubiji Wanji. Kabiji asumine, kufuma mu mubiji Wanji, kuya mu mushiji, myaka biumbi bibiji byapitapo; bino kechi kyajinga kya Kayukilo ne. Abwa Bumi, abwa Bumi bwajinga mu Mashi, bwajinga Kayukilo. Amiwa nsakwikishiniikisha kwi anweba, mu mineti umotu, kupichila mu Baibolo. Ke Kayukilo kaiya pa

umo umo mwi atweba, mu kumwesha kuuba mba tuji ku lubaji lwa Kitapisho kyetu, kabiji wafikizhizhe mukambizho wakwa Yehoba.

<sup>26</sup> Petelo waambile, pa Juba ja Pentekositi, “Lapilai, anweba bonse, ne kubatizhiwa mu Jizhina ja Yesu Kilishitu mululekelo lwa mambo, kabiji mukatambula wabupetu Mupashi Wazhila. Mambo mulaye walailwa anweba, ne ku baana benu, kabiji ne baji kwalepa, ne bonse mo bavujila Nkambo Lesa wetu bo aketa.” Monai, kechi kwikimweshatu kwi abo ne. “Ne bonse mo bavujila Nkambo bo aketa.”

<sup>27</sup> Kuji bavula balanguluka mba baitwa. Bino bonse “aye Nkambo” ye wita! “Abo bo Ayukijile jimo, ibo bo Aita; bonse Aye bo aita, Aye wibabingisha; bonse Aye bo abingisha, Ibo bo atumbijika,” akya kintu kyapwilatu jimo.

<sup>28</sup> Kabiji umvwe mwatola muntu ao wabula kuketekela mba Mupashi Wazhila ye wa mujino juba, monai kyo babena kuuba? Abo babena kukana Kayukilo kaikala ke kiyukilo kya kunungakana kwabo na Kitapisho. Mwamona Moombena kutazha nyi? Ke kintu kyapeela bingi inge mwakonsha kumona mu—mu jishinda Lesa jo anembelamo. Aa Mashi etusendele kabiji twajinga... amwesha ki—kiyukilo kya Mupashi Wazhila, abo bo Bumi.

<sup>29</sup> Bino, bumi bwa nyama kechi bwakonsha kubwela mu muntu ne, mambo kechi byakonsha kuswang’ana ne, bumi bwa nyama kechi buji na mweo ne. Bumi bwa muntu buji na mweo. Nyama kechi uyuka mba nji mulekese ne. Aye kechi uyuka kyawama ne kyatama ne. Aye, aye ujitu... Aye uji na—na mupashi, bino kechi mweo ne. Pano vulukai, pano, mweo ye musango wa mupashi, nangwa byonkabyo.

<sup>30</sup> Pano monai, bino umvwe Bumi bwa Kitapisho kyetu, Yesu Kilishitu, Mashi Anji byo aichikile... Aye wajinga Lesa, wayuzhiwa mu Muntu umo. Bino, Aye waishile kufuma kwii Yehoba, na kwimwesha Aye mwine nobe muntu, nakutola Aye mwine musango wabu muntu, pakuuba mba etumweshe atweba ne Aye. Aye wajinga Mwanamukoko wa Lesa. Kabiji mukachi Kanji, amo mu Mashi...

<sup>31</sup> Bino Nayuka muntu umo waamba mba, “Aye wajinga mashi abu Yudeya.” Anweba mumvwa ba Yudeya na kwamba byobyo. Aye kechi wajinga mashi abu Yudeya ne, kabiji Aye kechi wajinga mashi abu Gentila ne. Aye wajinga Mashi akwa Lesa. Aye kechi wajinga nangwa na abu Yudeya... Aye kechi wajinga nangwa Muyudeya nangwa mu Gentila ne. Aye wajinga Lesa. “Aye—aye kisungu ukemita.”

<sup>32</sup> Bino, Nayuka mba anweba bantu bavula ne ba Polotesitati balanguluka mba jike jajinga ja kwa Maliya. Kabiji aye—aye musango wa bumi bwiya, bumi bwiya mu tubishi twa mashi. Mambo, kyanje wakonsha kusema njike, kwakubula

kusambakana na ng'onyi mulume, kechi jakonsha kutontoka ne, mambo kechi jiji na bumi ne. Bumi bufuma monka mu kwenda kwa mashi, ku lubaji lwa mwanamulume. Bino mu lulwe lubaji kechi mwajingapo lubaji lwa mwanamulume ne, nanchi, “bumi buji mu mashi,” bwafuminetu kwi Lesa bunke, kabiji Walengele kakishi ka Mashi munda mwi Maliya. Lesa Aye mwine, Mulenga Aye mwine, walengele Kakishi ka Mashi. Pano talai. Abo baamba mba, “Kyawama, kyajinga mubiji. Maliya wajinga na jike.” Ine, mwane. Aye kechi wajinga; na jike ne. Inge kyajinga jike, kuuba watambula malume kwakubula kwikala nang’umvwino ya ku mubiji ne. Kabiji inge Aye, wajinga na ng’umvwino ya ku mubiji, kika kyaubile Lesa?

<sup>33</sup> Aye walengele byonse bibiji jike ne Mashi. Abyo kine byo Ajinga. “Twamukwachile Lesa,” Baibolo byo aamba. Timoti Mutanshi 3:16, “Kwakubula ne lupata kyaitabilwatu mba kyafyamika kya bulesa kyo kikatampe: Lesa wamwekele mu mubiji. Twamukwachile Aye na maboko etu.” Awa mubiji wajinga Lesa. Kyakine, byo kyajinga. Aye wajinga Lesa mu byonse, mu musango wa bumuntu.

<sup>34</sup> Pano twamona mu kikye, aka kakinski ka Mashi byo kalajikile, akya kyasolwele Lesa. “Lesa wajinga mwi Kilishitu, saabena kupwanya ba panopantanda ne Ayemwine.” Kwepi, kafwako nangwa umo wakonsha kwikyuba ne, kafwako kyakonsha kubiwa ne; kyasendele Mashi azhila, Ayemwine. Lesa waishile pansi ne kwikala ke muntu, pakuuba mba amaname ku muzhilo Wanji Mwine. Inge Yesu wajingatu ngauzhi, muntu waabanwa kwi Lesa, nishi Lesa kechi uji na bukishika ne.

<sup>35</sup> Inge Nakonsha kwamba mba, “Lekai Mulongo Grant awfile pa bubi bwafwainwa kufwilapo Billy,” nangwa kintu kikwabo, luzhachisho, akya kyakonsha kwikala kintu kyabula koloka. Inge Najinga na nsongwalume wami wafwainwa kufwa pa luzhachisho lo Naambile, ne apo kechi kyaoloka ne. Kujitu buchibishi bwamambo bumo bwaoloka bo Nakonsha kuuba, ke kutola kifulo kyanji, inge Mbena kukeba ku mupulusha.

<sup>36</sup> Kabiji Lesa waikele ke muntu, pakuuba mba atole kifulo kya ndengamambo; Lesa wamwekele mu mubiji, kechi wajinga mushi ya Lesa Mwine ne. Bino, papo Aye wajinga, wamwekele mu mubiji, pa kusenda bubi bwa panopantanda. Kabiji Aye wimweshehe Aye mwine mwi atweba, pakuuba mba atweba tuyukanyikwe mwi Aye. Mwamona mwine mwingilo wakikye nyi?

<sup>37</sup> Pano twatana kuuba mba kuyukanyikwa kwetu na Kitapisho kyetu, Bumi bwa Kitapisho mwi atweba, ao ye Mupashi Wazhila. Aka kakishi byo kalajikile, kalupwile Lesa, kalupwile Lesa, amba Aye watokesha bantu na Mashi Anji Mwine ne kubika Lesa mu muntu jibiji. Lesa mwi obewa, Bumi Bwapeenape!

<sup>38</sup> Kabiji yense wafunda bya ki Ngiliki wayuka kyokyo kyambo, Bumi Bwapeenape, kifuma ku kyambo kya Z-o-e, Zoe, akyo kyalumbulula mba “Bumi Bwanji Lesa.” Abyo ibyo. Jishindatu jimo ja kwikelamo pa Bumi, kujitu musango umo wa Bumi Bwape, kabiji abwa ke Bumi Bwanji Lesa mwi obewa. Mwamona? Nanchi uji na Bumi Bwapeenape, mambo Aye ye yenka Peenape ujiko. Kabiji atweba twi misango ya milanguluko Yanji, kasa kukyangye kwikala ne kintendekesho kya inontanda nangwa kintu kiji kyonse. Aye yonse ke milangulukotu Yanji, kabiji atweba twikusapulwa kwa milanguluko Yanji byo yajinga.

<sup>39</sup> Kabiji Aye waishile pakuuba mba afumyepo bubi. Kafwako nangwa umo wakonsha kwikyuba ne. Kechi kwajingapo nangwa umo wafikilamo kwikyuba ne. Kafwako nangwa umo wakonsheshe kwikyuba ne kanatu Aye, kabiji Wikybile.

<sup>40</sup> Kabiji pano, kimye abwa bumi byo bwalupukilemo mu yewa mubiji, Muntu, ao wajinga Mwaana wakwa Lesa (Bulume bwanji bwalengele kishimikwa, nobe mushimikishi, washimikile kyokya kishimikwa Aye kyo atwelelemo, Ayemwine, Lesa ye waubile kyokyo.), kabiji pano, abwa bumi byo bwasendelwe, aa Mashi, kuchila kwa mashi, waichijile pansi, kijitu pomo *nobe* Abela byo aichijile pansi, bino kufuma mu oa Mashi mwaishile Mupashi Wazhila wakwa Lesa, kabiji Awa watuminwe ku muntu pa Juba ja Pentekositi, pakuuba mba twimweshe na Kitapisho kibafwijile. Kechi kujipo jishinda jikwabo pantanda jo twakonsha kwikitambwilamo ne. Ke Kayukilo kawama!

<sup>41</sup> Talai, inge wajinga na luzhachisho lwa kufwa, kabiji wayuka mba mbena kuya ku kipona kya malaiti, kabiji vulukai, kukana . . .

<sup>42</sup> Dallas, umvwai! Kukana Mashi akwa Yesu Kilishitu, Kayukilo ka Mashi Anji, inge mwi Kamona kabiji mwi Kankana, ukakumanya Buchibishi bwa mambo na Mashi Anji ku maboko anji. Ndengamambo, membala wa kipwilo, vulukai kyokyo.

<sup>43</sup> Pano byepi inge Lee Oswald wafwainwa kwikyuba, aa mobaacheche, kabiji wasulwijile ku Kinje Kikatampe kyantanda kyo aimeneko; kabiji wayukile, kufuma mu kwipaya Ndamakyaalo, kechi kwajingapo nangwa lusa lucheche ne, awa muntu wikyummwile byepi! Kyafwajilwe kwikala kintu kyakatazha bingi. Aye kechi wikikumenye ne, mambo muntu mukwabo wamulozele. Pano langulukai kwikala ku meso a Kinje Kikatampe kyatanda yonse kyazhingila, na mashi a muntu mu kwenu ku maboko obe, Ndamakyaalo wa United States! Akyo kikekala ke kintu kyakonsa, kwi anweba bantu mupita ku Mashi akwa Yesu Kilishitu, byo mukemana ku binje bya Lesa. Mukasulwila inge mwikiyuka. Oswald kechi waubilepo kintu kyakila ne kanatu lufu, bino Lesa ukufumya Peenape kufuma ku Kyeenyi Kyanji. Kikekala kintu kyakonsa bingi. Monai.

<sup>44</sup> Inge mwafwainwa kwiya mu binje, na mambo a kuzhatwa, wafwainwa kukeba ng'ambi wawama ye wakonsha kutana. Muntu wakonsha kwikyuba.

<sup>45</sup> Kabiji muntu yense wasemwa pa ntanda, Amiwa kechi nasakamana ne nangwa afumetu ku nzubo yawama byepi, aye wazhatwa na Mashi a Yesu Kilishitu poso watambula lulekelo lwa mambo lwao. Kabiji jishindatu jakuyukilamo mba lulekelo lwa mambo lwafkilamo, kanatu Kayukilo ke bika Akokene pe obewa, kabiji uji na Kayukilo.

<sup>46</sup> Monai, obewa wazhatwa, kabiji wakonsha kukozha ng'ambi obe pakuuba mba akwimeneko ku mambo. Kabiji inge Nailenga ku Buchibishi bwamambo bwa Lesa, Amiwa kechi nkeba pulisiti ne, Amiwa kechi keba muntu ne; Amiwa keba ng'ambi wakila mukuwama ye Nakonsha kumona mu kunyimenako ku mambo ami.

<sup>47</sup> Lekai ng'ambe ku kikye, kwi anweba, mulunda nami Mwinakilishitu. Ng'ambi wetu iye ye mutonyi, kabiji wetu—wetu mutonyi iye waikala ke ng'ambi wetu. Aa mambo apwa inge twatambula lulekelo lwa mambo Anji. Aye mutonyi Aye mwine waikele ke ng'ambi, kabiji awa mutonyi ne ng'ambi ye Muntu umotu. Lesa waikele ke muntu, pakuuba mba Aye abingishe muntu pa lufu Lwanji Mwine lo Abikile pe aye. Aleluya! Akyo kyalumbulula mba, “Atotwe Lesa wetu!” Aye wafkilamo mitotelo. Mutonyi wetu kabiji ng'ambi wetu ye Muntutu umo.

<sup>48</sup> Awa Mupashi Wazhila ko Kayukilo kwamba mba twalekelwa mambo. Aa mambo apwa. Ku mwanamulume yense ne mwanamukazhi awo kine watambula lubatizhilo lwa Mupashi Wazhila, aye wa esekwa kala, aye wimwesha pamo na ng'ambi wanji, na mutonyi wanji, na kitapisho kyanji, kabiji aka Kayukilo ko aji nako kamweshatu kuuba mba lwendo lwanji lwa kuya Kulukumo lwalipilwa kala. Amena. Byonse byapwa. Aye walama koka Kayukilo. Ke lwanji, lubatizhilo lwa Mupashi Wazhila, abo bo bukamonyi bwa lusanguko bwa Yesu. Amena. Mwikiketekela nyi? [Kipwilo kyaamba mba, “Amena.”—Waku.] Akya kyo kiyukilo kyenu, obewa wakwachijila Kayukilo.

<sup>49</sup> Pano inge kechi uji na koka Kayukilo ne, kechi mukatwela ne. Wafwainwa kwikala na Kayukilo. Awo ye mutengo ukebewa, “Inge Namona mashi, aa mashi ko kayukilo. Inge Namona mashi, Amiwa kakupitaila.” Wafwainwa kwikala na Kayukilo. Inge wabula, kika, obewa kechi ukaya ne. Wafwainwa kwikala na Kayukilo.

<sup>50</sup> Inge kayukilo kechi ka mwekele ne, aa kayukilo kechi ka mwekele kookwa ne, nishi ne lulayang'ano kechi lwaikajikilwe ne. Mwaamba mba, “Kyawama, pano, Mulongo Branham, pano pembelaiko mineti umo.” Abyo kine ibyo.

<sup>51</sup> Aka kayukilo kajinga peulu ya lulayang'ano. Mambo Isalela wajinga na lulayang'ano lwa kusebululwa, kabiji

iji yense Muyudeya wakonsheshe kuya na kumwesha muntu uji yense, "Nakonsha kushiniikisha kwi obewa amba Amiwa naya kumukanda, Amiwa ne Muyudeya, Amiwa nasembululwa monka mwaila mukambizho wa Yehoba," bino nangwa byonkabyo akyo kechi kyamupangile ne inge kayukilo kechi kajingako ne. Aye wafwainwa kumwesha kayukilo. Mwikyumvwa nyi? [Kipwilo kyaamba mba, "Amena."—Waku.] Aye... Kayukilo kafwainwa kwikalako, nangwa byonkabyo. Kabiji inge uji mululayang'ano... Inge Muyudeya wakonsha kwamba mba, "Amiwa kechi mbena kubika mashi pa kibelo kyami ne, Nakonsha kushiniikisha mba Amiwa ne Muyudeya walulayang'ano," Malaika walufu wamutaine. Nangwa ekaletu walukokelo byepi, nangwa ekale membala wa kipwilo byepi, nangwa apana byepi bya bujikumi, nangwa ambe byepi mba naitabila mwi Yehoba; Yehoba wakebelenga konka kayukilo.

<sup>52</sup> Kabiji Aye wikuba leelo, ne apo. Kyafwainwa kwikalala byonkabyo. Byo kyafwainwa kwikalala, "Mambo kechi kujipo jishinda jikwabo mushi ya Mwiulu, jizhina jikwabo japewa ne, mujishinda jiji jonse ne," nangwatu kikale byepi kyawama, kyalukokelo. Aka Kayukilo kafwainwa kwikalala konka, ne kumweshiwa.

<sup>53</sup> "Aa mashi," mwaamba mba, "kyawama, Naipaile mwanamukoko kabiji Namubika mu kipe. Amiwa ne butuma jibiji kuno." Abyo kechi byo Aambilie ne. Afwainwa kwikalala pa jishiki kabiji ne pa kibelo. Kyafwainwa kumweshiwa.

<sup>54</sup> Kabiji bumi bwenu bwafwainwa kumwesha koka Kayukilo kaji pe obewa. Oo, anweba ba Pentekosito, kika kyatamako kwi anweba? Suki ya kwichika, bilungi byapetwa, mwanamulume, bisela byatama ne bintu bikwabo, ako akwa kumwesha kwa Mashi a Nkambo Yesu Kilishitu ke Kayukilo ka Mupashi Wazhila? Obewa, byo uji na musango wa bulesa, kabiji ne kutela "bulozhi" ne bintutu bikwabo, mingilo yakwa Lesa, "bulozhi." Mumwesha byepi kayukilo?

<sup>55</sup> Baamba mba, "Amiwa ne Pente..." Amiwa kechi natako muchima ku byo uji ne. "Amiwa ne Baptist. Amiwa ne Pres..." Amiwa kechi natako muchima ku byo uji ne. Aka Kayukilo kafwainwa kwikalako. Lesa Wikakeba, kabiji kafwako kintu kikwabo ne kanatu kyokakyo.

<sup>56</sup> Anweba mwamba mba, "Kyawama, Amiwa njina bya bu dokotala." Amiwa kechi natako muchima na madigili o uji nao ne. Lesa ukeba konka Kayukilo, kabiji Kyonka kyotu. Kyo kiyukilo kya kuuba mba jishinda jobe jalipilwa. Aye kechi ukasenda tuyukilo tobe nangwa kintu kikwabo ne. Aye wafwainwa kwikalala na konka Kayukilo.

<sup>57</sup> Awa wendesha sakya waaambilie mba, "Kuno, pembelaiko mineti umotu, ako kechi kayukilo kami ne."

<sup>58</sup> Wendesha ndeke wamba mba, “Kyawama, yanga kokwa pakino kimye.” Jichikichi ke kayukilo. Obewa yanga kokwa na kubula wendesha ndeke, “Kuno, Mbena kukeba kutwela mu ndeke yobe. Mutengo ke byepi?”

“Twelaimo mutambule kayukilo kenu.”

“Oo, Amiwa nkemulipila.”

<sup>59</sup> “Amiwa kechi nakonsha kwikisenda ne. Obewa kechi wakonsha kutwela mu ndeke yami ne kana walipila mutengo ne kutambula kayukilo. Amiwa mbena kukeba kayukilo.”

Mwaamba mba, “Kyawama, Naile ku sukuulu. Naubile *kikye*. Na . . .”

<sup>60</sup> Amiwa kechi natako muchima na kyo wauba ne, wafwainwa kwikalala na Kayukilo nangwa kechi wakonsha kutwelamo ne. Amena kabiji amena. Kechi mwakonsha kwikimona ne? Lesa ukeba aka Kayukilo. “Inge Namona mashi, kabiji ipo Amiwa po kakupitaila inge Namona kayukilo.”

<sup>61</sup> Kechi ka mweshiwe ne, lulayang’ano kechi lwajingapo lwaikajikwa ne. Aye Muyudeya wafwainwa kwamba ne kwishinikisha aye mwine kwikalala—kwikalala Muyudeya waya kumukanda, wakonsha kusenda balongo banji ne kwamba mba, “Tala kuno, Amiwa naya ku mukanda.” Akyo kechi kyalumbululapo kintu kimo ne.

<sup>62</sup> Mwamba mba, “Amiwa ne Methodist. Amiwa ne Baptist. Amiwa ne Pentekosito. Amiwa ne *kikye*. Amiwa ne *kyokya*.” Akyo kechi kilumbululapo kintu nangwa kimo ne.

<sup>63</sup> Wafwainwa kwikalala na Kayukilo. Kabiji Kayukilo inge kaiya, Kapana lushimuno lwa Kilishitu. Aye waambile mba Kikobiwa. Kabiji Kilishitu ke Kyambo. Kabiji mwakonsha kukana byepi mba Baibolo wakine, lubaji Lwakyo, kabiji nangwa byonkabyo mwaamba mba uji na Kayukilo, inge Kayukilo kaikala ke lushimuno lwa Yesu Kilishitu? Monai, akyo kyo Nakumya.

<sup>64</sup> “Oo,” kwamba mba, “Amiwa kechi naketekela ne, Naketekela mba moba a bya kukumya . . .” Oo, talai, kechi pajipo Kayukilo popo ne. Aka Kayukilo kaswishang’ana na Kyambo kyonse mba “amena,” bintu byonse, mambo ke Lesa Ayemwine. Mwamona? Kijitu bulongo.

<sup>65</sup> Pakuuba inge kayukilo kafwako, lulayang’ano kechi lwaikajikwa ne. Lwa fumishiwapo. Pamotu ne kino kimye! Nangwatu byepi—byepi byo wakonsha kwamba, wakonsha kwamba bya musango ka, “Amiwa naketekala Kyambo kyonse kiji mu Baibolo,” kwaamba mba, “Mulongo Branham, Na—Nakonsha kwambula pakachi ka Baibolo, Baibolo yense, na muchima. Naketekela byonsetu Bye.” Akyo kyawama. Satana wauba, ne aye. Uu-uu. Kisendatu Kayukilo!

<sup>66</sup> “Kyawama, Mulongo Branham, Amiwa njina kibumba kyayula madigili. Amiwa njina Bbachela wa Busendwe bumo, kabiji Amiwa njina digili wa budokotala, kabiji ne LLD. waki Latin. Kabiji, oo, Nanemba mabuuku. Nauba kikye. Nauba byonse bye. Nauba—Nauba byonse bye bintu.” Amiwa kechi natako muchima ne. Abyo bijitu bulongo, bino nangwa byonkabyo wafwainwa kwikalala na Kayukilo. Aka Kayukilo, nangwa byonkabyo Kayukilo kakebewa!

<sup>67</sup> Mwaamba mba, “Amiwa ne wafunda Baibolo. Amiwa ne—Amiwa ne muntu wawama. Amiwa ne *kikye, kyokya*.” Akyo kyakonsha kwikalala kyawama, akyo kijitu bulongo, bino nangwa byonkabyo wafwainwa kwikalala na Kayukilo!

<sup>68</sup> Pano, lufu lwajingatu pepi kufikila mu Ijipita pa kimye kyonse, kabiji ne lufu nalo lujiitu pepi kufikila kino kyaalo pa kimye kiji kyonse.

<sup>69</sup> Anna Yeansa, Naumvwapo kintu kimo nobe bashobe, baambilepo kintu kimo. Amiwa kimye kyonse natemwa bingi kyokyo. Aye waambile mba, “Anweba mwayuka, kino kyaalo, na bubi bumo, inge Lesa waleka America pa byo abena kuuba, Aye kikamuwamina kusangula Sodoma ne Gomola kabiji ne kulomba lulekelo lwa mambo, pa kwibasoka.” Kabiji akyo kijitu bulongo.

<sup>70</sup> Vulukai, Isalela walipijile pa bubi bonse bo aubile, kabiji nanchi ne atweba. Pano tubena kwikalala mung’anyi musango? Nyingishai bya nkondo! Bwelai kwi Lesa, kipwilo! Kechi kwambila bibye bintu mambo a kukebatu kupusanako ne. Amiwa mbena kwimubula nobe lujimuno. Mwaketekela!

<sup>71</sup> Lufu lwajingatu pepi kufika. Lesa wibamweshe bupe Bwanji ne lusa Lwanji, kupichila mu bulume ne biyukilo ne bya kukumya (nanchi Aye ne leelo byo auba kasa akyangye kufumyamo Kipwilo), nangwa byonkabyo kechi bakebele kulapila ne kwitabila mbila ne.

<sup>72</sup> Monai, kwajinga mbila kusendwa kwa kipwilo kasa kukyangye kufikizhiwa ne. Kimye kyonse kyafwainwa kubiwa. Kimotu ne pano. Kyonse kimweka kya bumupashi ke kiyukilo kyafuma kwi Lesa. Mwikiketekela kyokyo nyi? [Kipwilo kyaamba mba, “Amena.”—Waku.] Kijitu pamo nobe Mbila, kuji kiyukilo kabiji ne Mbila yalondela kiyukilo. Lesa wabujile Mosesa, amba, “Inge kechi bakaketekela jiwi ja kiyukilo kitanshi ne, kapepo bakaketekela jiwi ja kiyukilo kya bubiji.”

<sup>73</sup> Pano, inge mwamona biyukilo kasa bibena kubiwa, bino kasa kwabula mbila kunyuma yakyo ne, kwaikalatu sukuulu wakala wa kufunda kwa mamboawama kabiji ne kuya kulutwe, akya kechi kyafumine kwi Lesa ne. Pakuuba kuji kiyukilo kyamweka, Mbila ilondela panyuma yakyo. Pano talai. Yesu waishile pa kyokya kifulo . . .

<sup>74</sup> Bushe Amiwa mben a kuuba kyongo nyi? Nangwa yense uji pa yuwe maikolofoni, kibena kumvwanyika nobe kikuwila kibena kubwela. Kapepo kyabaisha pacheche. Nakeba mba anweba mwikyumvwishe.

<sup>75</sup> Kimye Yesu kyo aishile pa kyokya kifulo, Aye kechi waambilepo byavula ku bantu ne, muntu yense wa mukebelenga Aye mu kipwilo kyanji. “Oo, awe mwanyike Ngauzhi, twaikala bingi na lusekelo pa kwikala Nanji.” Aye wabukilenga bikola. “Oo, lukumo lwikale kwesi Lesa. Lesa wayimenye Muntu mukatampe mukachi ketu.” Akya kyajinga kyawama. Nanchi juba jimo kyaishile pantu pamo pakuuba mba... Akya kyajinga kiyukilo Kyanji.

<sup>76</sup> Isaya 35 waambile mba kikekala ke kiyukilo. “Ne yewa walemana ukakilauka nobe lupala,” kabiji ne bikwabotu, “bampofu bakamona.” Kyajinga kiyukilo.

<sup>77</sup> Aye wamwesheshe kiyukilo Kyanji amba Mesiyasa, ne bikwabotu. Kabiji abo, bavula mwi abo, baambile mba, “Ee, Nakonsha kuyako ku kyokyo.” Kyawama, pano, inge akya kyajinga kiyukilo, kwafwainwa kwikala jiwi ja kiyukilo. Ng’anyi jiwi jajinga kunyuma yakyo? Kimye Aye kyo atatwile kufunjisha mafunjisho Anji kabiji ne kwibatela mba jibumba ja milolo mu sono. Aye walekele kuya nkuwa kufuma pa kyokya kimye, mwamona, jiwi byo jaishile na kiyukilo. Kiyukilo kyo kitanshi kyamwekele.

<sup>78</sup> Mosesa waile mu Ijipita na kiyukilo. Kabiji wataile pansi mukombo wanji, waalukile ke mulolo. Akya kyajinga kiyukilo. Bino pa kupitapo ka kimye, jiwi jaishile na kiyukilo. Kabiji kyajinga kyapusanako. Monai, kechi bakeba kyokyo ne. Aja—aja jiwi, jafwainwa kwikala, jalondela kiyukilo. Kabiji kechi kwajingapo kimye kikwabo po kyakonsha kwishila ne kanatu kyoka kya kimye, mambo kyajinga kimye kya Binembelo kufikizhiwa. Monai kyo Amubuuji, mu kipupu kibena kutema, “Namona kubiza kabiji ne bomvwa bantu Bami, kabiji namona kumanama kwabo na mambo a bakulumpe bena Ijipita, kabiji Navuluka mulaye Wami ye Nalayang’ene ne Abulahama.” Myaka foolo aduleendi yapichilepo, kabiji Aye wabuuji Abulahama mba bakekala monkamwa. Monai, kechi kwajingapo kimye kikwabo kyafwainwa kubiwa ne. Mosesa waishile pa kyonka kya kimye.

<sup>79</sup> Lesa koloko yanji ikatampe ibena kwendatu bulongo. Kechi kukekala mineti umo watangilako lubilo nangwa mineti umo kunyuma ne. Kikekalatu mu kimye. Kyawama, nanchi, mwamona, bintu byonse bibena kwendatu bulongo, kechi bya konsha kwiya pa bimye bikwabo ne.

<sup>80</sup> Nangwa bibye bintu kechi byakonsha kwiya pa bimye bikwabo ne. Akye kechi kyafwaijilwe kwiya mu moba akwa Luther ne. Kechi kyafwaijilwe kwiya mu moba akwa Wesley

ne. Moba a ba Baptist nangwa ba Methodist, mu moba abo, kechi kyafwajilwe kwiya ne. Kyafwainwa kwiya ponka pano. Isalela wafwainwa kwikala kyaalo. Bipwilo byafwainwa kwikala byonka byo baji pakino kimye. Kwafwainwa kwikala mbila ya busatu, nkulo ya kipwilo kya busatu. Kwafwainwa kwikala Laodikeya. Kechi kyakoshekele kulengwa ne poso Pentekositi waiya ne kufikizha kimye kyabo, kabiji bafuminemo be bungizha, kabiji bauba byo baubile. Nanchi kyafwainwa kufikizhiwa, ne Nkambo waiya, Aye byo bamufumishe mu kipwilo. Aye kyo Kyambo.

<sup>81</sup> Abo baji na moyo wakwimena kyokya Kyambo kuji konse. Abo bazhindamatu pa Kyokya, bino nangwa byonkabyo bekyubila bisela.

<sup>82</sup> Chicago, konka kuno kechi papita kimye kyabaya ne, kimye Nkambo kyo ampele kimwesho. Najinga na bamingilo fili aduleendi bayishile kokwa. Naambile mba, “Pano Nayuka anweba byo muji...” pa lukunwa wa mulolo, kabiji ne bikwabotu, Naambile mba, “umo mwi anweba atole Baibolo kabiji eye kwimana ku lubaji lwami ne kwikilengulula.” Jajinga jibumba jazhinda bingi jo mukyangye kumvwapo. Naambile mba, “Nanchi fumai mu nyuma yami.” Monai, kechi kiji mu milanguluko wa sukuulu wabo ne.

<sup>83</sup> Nangwa byonkabyo, baamba mba, “Mulongo Branham ngauzhi umvwe washingwa manyi, bino umvwe kushingwa manyi kwafuma pe aye, oo, Amiwa kechi nayuka ne.” Pano nga... Inge akyo kechi ke kiyukilo kya—kya—kya—kyamvwangakana na masukuulu abyambo bya lesa ne! Akyo kiji...

<sup>84</sup> Kyambo kya *ngauzhi* kyalumbulula mba “ke usolola lumwekesho lwa Bulesa bwa Kyambo.” Akyo Kyambo kya Nkambo kyaishile ku bangauzhi. Abyo Yesu byobyo ayukanyikilwe. Kabiji baambile panyuma yakusanguka, baambile mba, “Twayuka mba Aye wajinga ngauzhi wakwa Lesa,” monai, “kafwako muntu wakonsha kuuba bibye bintu ne kanatu Lesa uji nanji,” bino kechi baswile mbila Yanji ne. Abo kechi bamuswile Yoano ne, bino wajinga ngauzhi. Elaija kechi bamuswile ne, kafwako nangwa umo wa mwiabo ne, kabiji bajinga na lumwekesho lwa Bulesa.

<sup>85</sup> Kyambo, kyambo kya Kizungu, *ngauzhi*, byambo bya Kizungu byakonsha kulumbulula kiji kyonse, kyalumbulula mba “musapwishi.” Bino inge waamba mba *ngauzhi*, wa Baibolo wakala, kyalumbulwile mba “shayuka.” Kabiji tuyukilo twanji twajinga, mba, byo abulang’ene byafwainwa kufikizhiwa, kabiji akya kyajinga kiyukilo mba ngauzhi; kabiji akya kyajinga kiyukilo kya kwamba mba uji na lumwekesho lwa Bulesa lwa Kyambo kyanembwa. Kabiji ne Lesa wikishiniikisha, kunyuma yanji, kyashinikishiwe.

<sup>86</sup> Byepi? Kyawama, kyafwainwa kwikala mujije jishinda, byo byonka. Kechi kujipo jishinda ja kwikizhokoloka ne. Lesa waambile mba kikekala tuyewa musango, kabiji byobyo kiji. Bino byokiji ne leelo, monai, aka Kayukilo kafwainwa kwikala konka, aka kamwesha kyokya Kyambo kabiji ne kwikilenga kwikala kyakine. Nanchi Aye wibalaile, byo Anengezhezhe bantu Banji bonse ba muntanda-yamulaye, pano, Aye byo ailenga na kwikala na kukwe kulupuka, akyo kyajinga kipasha.

<sup>87</sup> Pano Mbena kweseka kulupuka nobe mu mamineti fifitiini, mamineti tweti, na Mbila. Monai bulongo pano, Nasaka namba anweba mutambule kikye, mambo kape kechi Nakonsha kwimumumona jibiji ne, mwamona.

Monai, pano monai byo Anengezhezhe bantu Banji.

<sup>88</sup> Baanga bayuka mba Aye kechi ukingya mashinda Anji ne? Aye kechi wiyuba ne. [Kipwilo kyaamba mba, "Amena."—Waku.] Aye...pano talai kupita mu Baibolo kabiji mumone inge Aye wakipipula. Ine, mwane.

<sup>89</sup> Mujishinda ka Aye jo anengezhezhemo bantu? Patanshitu, Aye watumine ngauzhi na kiyukilo, ao wajinga Mosesa. Abyo ibyo nyi? [Kipwilo kyaamba mba, "Amena."—Waku.] Kabiji kiyukilo kyajinga na mbila, ke mbila ya kuuba mba "benengezhe," bailenga ku ntanda ayo yalailwe. Nanchi Aye wajinga na kyakuyukiloko, yuwe ngauzhi, akya Kyeya kyajinga peulu yanji. Awa Mumbulungwa wa Mujilo walondejile yuwe ngauzhi, twayuka kyokyo, wapichile mungyetu ne Mosesa. Twavuluka kyokyo. Kabiji pano Aye wibapele kiyukilo kya luketekelo kuuba mba kechi bakekalapo na moyo ne, bonse badinga na lubazhibazhi; ako Aye ko aambile mba, "Inge Namona koka kayukilo, Amiwa kemupitaila."

<sup>90</sup> Monai byo Aubile pano. Aye wanengezhezhe kiyukilo patanshi, muluwe, mbila yayukinyikwa, kuyukanyikwa kwa muluwe, kabiji ne kayukilo kaluketekelo mba jishinda ja lipilwa. Abo babena kuya mu ntanda ya mulaye.

<sup>91</sup> Kintutu kimo kyo Auba leelo! Kika Aye kyoaubile? Aye wituntumijile Mupashi Wazhila. Aye Mupashi Wazhila ye Muluwe, kabiji ne Binembelo bya mumwesha Aye mwine bya mulengela kuyukanyikwa Aye mukachi ketu, aye umotu keesha, leelo, ne myaka yonse. Kabiji Kayukilo ke luketekelo. Kika kyo tubena kuchiina? Ng'endelo yetu yalipilwa kala kabiji ne atweba twimwesha kala na Kitapisho kyetu. Aye kechi wakonsha kukulekelesha ne. Aye walaile kyokyo. Atweba twayukanyikwa.

<sup>92</sup> Isalela kulupuka mu Ijipita, byonka byo Naambile, kijitu pamo nobe—nobe Musongwa ubena kulupuka kufuma mu kipwilo. Kimye Mosesa kyo atatwile mwingilo wanji, Isalela yense wa bungakene pamo mu Gosheni, na kulomba ne bupopweshi, kyakine, bafumine mu mampuzha onse a Ijipita. Ajo jo jishinda Musongwa jo akobilamo, ukalupuka monse

mu Oneness, Mu bubiji, Mu busatu, kabiji ne mintundutu ikwabo. Ukalupukamo. Kyafwainwa kubiwa. Pano twatanga mumwe mu Bahebelu aye... Atweba pano, kintu kitanshi kyotwafwainwa kulangulukapo, kufuma mu mampuzha onse, "Kufuma mukachi kababula luketekelo." Bino Mupashi Wazhila walaile kwita kyokyo mu moba akupelo, "Fumaimo mwi babula kwitabila." Monai.

<sup>93</sup> Twatana mu Bahebelu 10:26, Nanemba papo, kyaamba bibye, "Inge twalenga mambo a mulupata panyuma ya kutambula maana a Bukine, kechi kujipo kitapisho kikwabo kya bubi ne," monai, inge wabula kuketekela kya mulupatatu.

<sup>94</sup> Pano inge mwakonsha kumona, kika kyo Nakonsha papo, inge mwakonsha kundekelako mambo pa kimye kicheche poso Nekilondolole kupichila mu kimwesho. Nakonsha kumvwa mu Mupashi, kechi kyaubiwa bulongo ne. Mwamona? Monai.

<sup>95</sup> Awe ke Bahebelu, baji mu jishinda jabo na kulupuka. Lesa wasalulwile bantu twelufu, nangwa Mosesa byo aubile, konka ku kuboko kwa Lesa, kuya na kukikizha ntanda; kabiji babwelele, baletele kayukilo ka ntanda. Kabiji byo bafikile kokwa, jikumi mwi abo bajinga bingi na moyo. "Kika," baambile mba, "aba bena Ameleki bajinga kokwa, twamwekelenga nobe batete." Yoshiwa ne Kalebba babwelele, baletele bukamonyi, "Twakonsha kwikyuba!"

<sup>96</sup> Mwamona, abo ke baitabila bakumupaka. Abo bapichile mu bintu byapusanapusana, kabiji ne kupita mu kipwilo, kabiji ne kwinunga ku kipwilo, ne mabatizhilo ne misango yonse. Pano inge kyafika pa kwabuka na kutambula Kayukilo, bukamonyi mba Ntanda iji konka, abwa Bumi... Yesu Kilishitu kechi wafwa ne. Ke lubaji lukwabo. Aye wikala monka. Aye uji ne atweba, Aye pano uji mwi atweba. Inge kyafika ku kyokyo, "aa," abo kechi bakonsha kuketekela kyokyo ne. Akyo kyajinga kyakijisha bingi, mwamona. Kabiji babwelele, kabiji abo, bonsetu, wafwijile mungyetu, kafwako nangwa umo wa mwiabo wa abukile kubushiya ne. Kabiji, monai, inge twakana kuketekela, atweba ba Methodist, Baptist, Presbyterian!

<sup>97</sup> Naketekela mba mufunjishi wami wakala waikala muno leelo. Dokotala Roy E. Davis, anweba bavula mwamuyuka, ponkapo pa Fort Worth, aye kape waikala muno. Navuluka mba twisambile pa bibye bintu, yavula, myaka yavula kunyuma. Aye wambatizhe mu lwitabilo, mu kipwilo kya Missionary Baptist.

<sup>98</sup> Kabiji talai, muno, pano, inge atweba... inge—inge twaiya kufika kumupaka, ne kwamba mba, "Kyawama nanchi, lukumo lwikale kwi Lesa, Naambile mujimi, aleluya!" Abyo kechi ibyo ne. Inge mwakonsha kwamba mba, kubula kuketekela kimo kya mukyokya Kyambo, pajipo kintu kimo kyatama na kyakupitamo kyobe. Mwamona?

<sup>99</sup> Anweba mawaiya kufika ku Ntanda kabiji mwamona mba koiji. Anweba mwamona mba Yesu wasanguka. Aye uji mukachi ketu. Anweba mumvwa Kyambo kilondela mbila, kabiji nangwa byonkabyo mwabula Kwikiketekela ne, mwayuka kimweka? Nanchi abo bafwijiletu mungye. “Inge twalenga mambo a mulupata panyuma ya kutambula maana a Bukine, kechi kwakishala kitapisho kikwabo kya bubi ne.” Abyo Buuku wa Bahebelu byo etubuula.

<sup>100</sup> Kabiji pano monai, byo tubena kumona biyukilo bikatampe pantanda bya kimye-kyakupelo, Aye byo alaile, pano ibyepi kukilapo byo kibena kwitujimuna mba kimye kyafwenya pepi. Fumai ku kubulwa kwitabila. Iyai pamo. Twafwainwa kwitemwa umo ne mukwabo kabiji ne kuketekela, kabiji twiabanyi atweba bene kufuma ku ntanda.

<sup>101</sup> Monai, abo kechi baishiletu pamo na kwamba pa mbila ne. Abo bafwijilwe kutwelamo mwiakyo, kwikalwa pansi ya mashi. Kechi kwiya ne kwamba mba, “Mwayukatu, Mosesa witubujile atweba, aye muluwe, aye waambile mba, aye witubujile mba twafwainwa kwikalwa na mashi. Mwalangulukapoka pa kikye, bansongwalume?” Akya kechi kyajinga ikyo ne. Kwatai mwanamukoko mu mwipaye, kabiji mubike mashi peulu popa!

<sup>102</sup> Twakonsha kwiya twaikala ne kuswa Kyambo, kabiji ne bintu byonse bikwabo, bino kasa babula koka Kayukilo, ng’anyi buwame bujimo kwi atweba? Kechi kyawama ne. Twelai pansihi Yakyo. Aye kechi ujipo na sambu pa yense wabula pansihi ya mashi ne. Kabiji Aye kechi ujipo na nsambu pa uji yense ne, leelo, wafuma pansihi ya Kayukilo.

<sup>103</sup> Kisemi kyonse, kikalatu mutende kana baikala mushi ya kayukilo, kabiji ne koka kayukilo kamwekanyika. Kisemi kyonse! Mwikiketekela kyokyo nyi? [Kipwilo kyaamba mba, “Amena.”—Waku.] Leelo twafwainwa kuvuluka kyokyo, bantu. Baana betu!

<sup>104</sup> Kabiji babo bakitwala-babulamo maana kabiji ne mazha akwenda-na-kuzhokoloka, kabiji ne bonse bo ba Beatles ne byola, bino mwayuka mba byonse bye byatanwa mumwe mu Buuku, wa Baibolo? Kyaamba byobyo mu Lumwekesho. Kyakine, kyubiwa. Nga bantu, abo, baji—baji...abo, abo, monai, abo, kechi baji na...Abo bafwa. Abo kechi bakonsha kwimana ne. Abo kechi baginga mu Peenape ne. Abo kechi baginga mu Milanguluko ne, nanchi bakonaika. Abo bakobiwa kikupu, bakonaikatu kupwijijika. Bakamanyikwa mu bimye bya kubulwa kubala, pa byo bauba, pakuba kintu kyonse kiji na ntendekelo kiji ne na mpelo.

<sup>105</sup> Ke kyokya kyabula ntendekelo, kyo kyabula mpelo ne. Kujitu musango umo wa Bumi Bwapeenape. Musango umotu wa Bumi Bwapeenape, bo tubena kukabila. Monai.

<sup>106</sup> Yoshiwa, kyapitala kyabu 2 kya Yoshiwa, awa Ngentila pite waitabijile waumvwine, kabiji ne kisemi kyanji, kabiji wibaletele mushi ya muzhinge wachijisha, wajinga kayukilo ka baluwe bakwa Yoshiwa. Malaika wa Lesa wakonauna wanemekele koka kayukilo, kabiji ko konka, mu yewa muzhi. Aya yajinga nkebelo yakwa Lesa, mu bakalume Banji, amba Lesa wakeba kako kayukilo, kabiji aka kajingatu buke. Amiwa kechi nasakama ne nangwa inge wajinga mukulumpe wa muzhi, nangwa inge wajinga muntu wazhijinsha mu muzhi, inge bayanga mu kipwilo kyabaisha mu muzhi, byonse mu muzhi byaponene kanatu yonkaya nzubo. Lesa buke bwanji, wanemekele koka kayukilo.

<sup>107</sup> Monai, Yeliko waumvwine mba Lesa ubena kuuba bintu bikatampe, bino abo kechi baumvwine lujimuno ne.

<sup>108</sup> Nanchi byo biji ne bantu leelo babena kumvwa bibena kuuba Lesa mu myaka icheche yapitapo ne, bino kechi babena kumvwa ne. Abwe bulume bukatampe bwa lusa ne biyukilo, nobe byonka Aye byo alaile, "Byonka byo kyajinga mu moba a Sodoma, nanchi byobyo kikekala." Byo alaile Aye mba akya kintu kikekalako! Monai kyamwekele mu Sodoma. Vulukai, akya kyajinga kiyukilo kya Sodoma. Pakuuba muluwe, wakwa Malakai 4, aye ke "kubwezha michima ya bantu ku bashabo, bashabo ba kipentekosito, kubwela ku Baibolo." Kechi kwakonsha kwikala Baibolo mukwabo ne, ke kintu kikwabo. Alwe ke lumwekesho lonse lwapwijiika lwa Lesa.

<sup>109</sup> Kabiji muntu umo waamba mba, "Kyawama, Naketekela lulwe lubaji, kechi Nayuka pa Kyokya ne."

<sup>110</sup> Aye muluwe wakine wakwa Lesa emubwezhe kunyuma ku Kintu kyonse! Mwamona? Monai, abyo Mupashi Wazhila byo oba, ukubwezha ku Kyambo kyonse kya Lesa.

<sup>111</sup> Lusa Iwanji Iwamweka, luzhachisho Iwanji Iwalondelapo. Abo bafwajilwe kuketekela mba bajitu bulongo mu binshimikwa byabo bikatampe bya madinominesheni byo bajinga nabyo mu Yeliko, bino bataine kuuba mba kechi bya ingijile ne.

<sup>112</sup> Kwajinga bambo ba... kape batwelele momwa mu musango umo, mwajinga bansongwalume bavula batwelele momwa, kabiji babujilwe mba babungizhe lukunwa yense watongwejilwe jimo. Kabiji aye watolele... kabiji waingijishe nzubo yanji ke kipwilo, kabiji watambulwijile baluwe; kabiji watolele bonse mu muzhi, bakonsha kwitabila, kwibabika pansi ya kayukilo.

<sup>113</sup> Mwanamukazhi umo mu bonse bwa buwame! Mwanamukazhi umo mucheche mubiji, kabiji yenka watelwa bibi, kapepo wapangilwe mu bipwilo byonse biji mu muzhi, bino aye waketekejile awa muluwe. Kabiji awa muluwe washile kayukilo, akya kiyukilo, kabiji Lesa wanemekele kayukilo. Nanchi byobyo kiji ne leelo. Ingi vulukaitu, kimye monaushi

wabukaji wakwa Lesa byo aishile, aya mitanchi ikatampe yonse yaponene, kayukilo kyalamine nzubo yanji mu mutende. Kechi mambo wajinga mwanamukazhi wawama ne; mambotu wajinga na lwitabilo ne kwingijisha kayukilo.

<sup>114</sup> Pano byepi inge waambile mba, “Ee, abo bajinga bantu bawama, Amiwa kine naumvwine bulongo mbila yo bapaine, bino, kyakishika, kyumvwanyika kwikala nobe kyabulamo maana pakwikala na yewa muzhinge wankobama pa windo wami, Amiwa nsakwikipedia selatu mukachi”? Kyafwajilw kupona. Kyafwajilwe kupona. Lesa wanemekeletu kayukilo, kititu pamo nobe kayukilo ka bumi mu Ijipita.

<sup>115</sup> Yoshiwa wajinga ke kipasha kya Yesu, mambo *Yoshiwa* kyalumbulula mba “Yehoba-mupulushi.” Aye wajinga kipasha kyakwa Yesu, wajinga wakishika ku kiyukilo kya kayukilo muluwe wanji ko asapwijile. Yoshiwa waikelle wakishika ku kyokya kiyuki kya kayukilo. Bonse bajinga mukachi bapulukile, mu Ijipita. Bonse bajinga mukachi bapulukile, mu Yeliko.

<sup>116</sup> Aye Mashi a Mwanamukoko ke kipasha leelo kya Kayukilo, amba Mupashi Wazhila ko Kayukilo ka leelo. Bonse baji mushi Yako baji na mutende. Bonse baji pangye Yako kechi baji na mutende ne. Mu Bahebelu 13:10 ne 20, Aye watelwa mba “lulayang’ano lwa myaka.” Lulayang’ano lwakala lwajinga kintu kingi, alwe ke Lupya, alwe ke “lulayang’ano lwa myaka.”

<sup>117</sup> Lesa, Lesa milaye ya Mashi-anji, itulengela kwikala bakasuluka ku bubi ne buvu, kabiji ne kwikala bapusanako ku bonse ba muntanda. Obewa kechi wakonsha kwikala na mvwajilo ya pusanako ne; uji yense wafwainwa ku mvwala kyapusanako. Obewa wafwainwa kwikala, mukachi, wapusanako. Abwa Bumi buji mukachi; kechi kumvwala ne, mvwajilo. “Abo Bufumu bwa Lesa kechi buji mukajo nangwa mu byakotoma ne, nangwa kumvwala bya kumvwala ne; pakuuba ke kukoka muchima, buwame, lusa, butekanye, mu Mupashi Wazhila.”

<sup>118</sup> Pano, milaye ilengela kwikala kwakubula bubi, kimwesha mba Lesa kechi—kechi wakutelela bubi bobe ne. Davida waambile mba, “Watokwa awa muntu Lesa ye abula kutelela mambo anji.” Kabiji Lesa kechi ukatelela bubi pa koka Kayukilo ne, mambo aka Kayukilo ke kiyukilo kya malipilo amba Lesa watambulwila kala. Kabiji obewa uji na kayukilo kakyo, kalupo-...lwitabilo lobe lwikapota. Kabiji uji na mutengo walupoto lwa bukuzhi bobe mu mubiji obe, pakuuba mba Aye umupopwele kabiji ne kumwesha milaye Yanji ne bulume.

<sup>119</sup> Alwa *Lulayang’ano Lupya* kyalumbulula mba “lulayang’ano lupya.” Aa *Mashi* kyalumbulula mba “Bumi.” Alwa *Lulayang’ano Lupya* ke *lulayang’ano lwa Mupashi Wazhila*, *Mupashi Wazhila* ubena kupana lushimuno lwa bintu byasangula Yesu Kilishitu kufuma mu bafu, kimwesha mba

Yesu witufikizhizha byonse bikebewa, kabiji amba ye mumi leelo. Aka Kayukilo kashiniikisha amba Aye mumi kabiji ubena kwimwesha Ayemwine pamo ne atweba, monka mwaila mulaye Wanji. Pano muntu wakonsha kutanga byepi Baibolo kabiji ne kumona mba Aye wikilaile, kabiji kumona Kilishitu wabwela mu ano moba akupelo mu musango wa Mupashi Wazhila ne kwimwesha Ayemwine mumi? Aka ko Kayukilo. Akya kyo kiyukilo. Awa ye Mutengo walipilwa.

<sup>120</sup> Kechi mwakonsha kuketekela mu byakumvwa bya ku mubiji ne. “Naumvwine mashika kwenda mu munyuma yami. Kabiji—kabiji Na—Na umvwine bwema bwa kintu kimo; namwene mashi mu maboko ami,” nangwa maanyi amo. Nangwa—nangwa, “Natambwile Digili wabu Sendwe.” Nangwa, “Nazhile mu Mupashi. Nabijikile. Naambile mu njimi.” Abya bintu byakonsha kwikalatu bulongo. Amiwa kechi jipo na kintu kimo nabyo ne, bino akyo kechi kyo Mbena kwambapo ne.

<sup>121</sup> Amiwa mbena kwamba pa kuyukanyikwa kya Kayukilo, Yesu Kilishitu, wasangulwa mwi atweba kino kimye, kasa emwesha Aye mwine, mukushinikisha-jibiji Kyambo Kyanji kyalailwa mu jino juba. Amena. Nanchi obewa ne Kilishitu mwi umo. Lesa ne Kilishitu ye umotu. “Aja juba, mukayuka mba Amiwa nji mwi Bataata, ba Taata mwi Amiwa; Amiwa mwi anweba, ne anweba mwi Amiwa.” Awa ke Lesa wasololwa mu bumuntu, kwimwesha Ayemwine mumi, pakupitapo myaka masauzande abiji. Ako ko Kayukilo.

<sup>122</sup> Inge obewa kechi uji mukachi ne, twelai bukiji bukiji, balunda. Kyakonsha ke kimye kyapwa. Kechi twayuka ne.

<sup>123</sup> Mweshai Kyeenyi Kyanji, Lulayang’ano Lupya, aa Mashi. Kabiji Aji omi pokapano, abena kushinikisha. Kabiji mambo Aji, tuji na nsambu pa byonse Aye byo etupotejile. Mwanamulume uji na lubatizhilo lwa Mupashi Wazhila, nangwa mwanamukazhi uji na lubatizhilo lwa Mupashi Wazhila, uji na lusa pa kintu kyonse Yesu kyo etupotejile, mambo akyo kyo kiyukilo kyo tuji nakyo. Abo bo bulume bwakupota.

<sup>124</sup> Nobe kyakumwenako mwaamba mba, “Kyawama, Mulongo Branham, watazha muka?”

<sup>125</sup> Apo, ne kilondolole bulongo pano, kabiji Nakeba anweba bantu mwakolwa mumvwe kikye. Talai, inge Amiwa mbena kufwa zala, kabiji Nayuka shinkwa umo, mba, upotwa kibese kimo, kabiji kwaiya mulongo umo waamba mba, “Auno kota, Mulongo Branham. Obewa ubena kufwa; tola kikye kibese.” Bino, mwayukatu, Nakonsha kwikala bingi na lusekelo na kibese kimo mu kuboko kwami pamo byonka byo Nakonsha kwikala na shinkwa mututulu mu kuboko kwami, mambo Njina mutengo walupoto. Amiwa njina kayukilo kaleta shinkwa. Kabiji ponkapa paji shinkwa; kabiji kintutu kimo, Amiwa mbena kulama kayukilo, kibese kipota shinkwa, Nakonsha

kwikalala bingi na lusekelo na kayukilo nobe byo Nakonsha na shinkwa.

<sup>126</sup> Pano, inge uji na lubatizhilo lwa Mupashi Wazhila, ako ko Kayukilo ka kuuba mba uji na byonse bya bukuzhi byafwijile Yesu, byaikala ke byobe, biji mu kuboko nkobe. Uji na moyo kwikikabila?

<sup>127</sup> Inge Nekibika mu pokochi wami, ne kwaamba mba, “Kyawama, Amiwa kechi nayuka ne kana Nakonsha kupota shinkwa nangwa ne,” Nakonsha kufwa nazala. Bino vulukai, musulu waamba mba, “Amiwa njina kukabila kumo, Mr. Branham. Umo ma cent tweti-faivi, mwakonsha kupota shinkwa umo.” Amiwa nji naji! Amena. Akyo kyapwisha byonse.

<sup>128</sup> Ao oene mambo leelo kyo tubujila kumona bintu byavula kubiwa, Kayukilo kechi kabena kumwekanyika ne, kene Kayukilo. Oo, tuji na misango yonse ya byabubela, bino Natazha mu kuuba mba kene Kayukilo.

<sup>129</sup> Talai, nanchi inge twavuluka ne kumwesha Kayukilo, Bumi bo asendele bwa Kayukilo, aa Mashi etwambilako pakino kimye. Vulukai, Mashi alulayang’ano ayukanyikilwe pamo na Kayukilo, kabiji Kyambo kitupa luketekelo lwa yewa mulaye. Aka Kayukilo ke kiyukilo kya kuuba mba lupoto lwaubiwa pe atweba.

<sup>130</sup> Pano, inge kechi uji monka mukyokyo ne, kyawama, onkao mambo, obewa kechi ukatambulapo kintu nangwa kimo ne; obewa ubena kwendatu mu mulaini wa milombelo, kufumapotu; kuya ku kitapisho, kasa utala peulu, na kubwela kulupuka lunyuma.

<sup>131</sup> Bino, oo, mulongo, inge aka Kayukilo kabikwa mu—mu—mu muchima obe, kabiji yukatu mba ke lusanguko lwa Yesu Kilishitu mwi obewa, kintu kimo kibena kumweka. Kechi kujipo kintu kimo kyakonsha kukwalula ne. Obewa wayuka ku lubaji lo ujiko. Lukokelo lwapwijiika ku Kyambo kyonse kya Lesa kilengela kupewa nsambu ya Kayukilo, kabiji kafwako kintu kikwabo ne. “Watokwa aye uba Mikambizho Yanji yonse, aye ukekala na luusa lwa ku Kichi kya Bumi.”

<sup>132</sup> Nanchi, inge twalomba, twafwainwa kwikalala na Kayukilo ka kumwesha milombelo yetu. Pano kechi mukakalwe kutambula kyokyo ne. Inge mwalomba, mwafwainwa kwikalala na Kayukilo ka kulama milombelo yobe; inge kechi kiji byobyo ne, twajijilaitu na kulomba poso Kayukilo kaiya, mambo kechi walailwa kwi katambula ne. Monai, wafwainwa kwikalala na kako Kayukilo patanshitu; ayo yo fweto ya malipilo, lwitabilo lobe lwa kwikiketekela.

<sup>133</sup> Bino, kiyukilo kya lukokelo lwapwijiika. Moyo wapwa. Paulo witubuula kyokyo, “Aa Mashi aamba bintu byawama.”

Mwaamba mba, “Aa Mashi aamba?” Ee, Mashi aamba.

<sup>134</sup> Mu Ntendekelo 4:10, twatana kuuba mba Lesa waambile mba—mba Kaina...nangwa, “mashi akwa Abela aambil kufuma pansi.” Twatana mu Bahebelu 12, amba, “Aa Mashi a lulayang’ano lwa Kilishitu aamba bintu byakila kuwama kukila a kwa Abela.” Mwamona? Twatana kuuba mba, Mashi aamba, Ambilako lubaji lobe. Abwa Bumi buji mwi obewa amba kufuma ku Mashi aichikile. Amena. Oo, mulongo! Nakonsha kutemwa inge muntu yense wafwainwa kumona kyokyo. Mwamona? Inge mwakonsha kumona byo kiji, ke Bumi buji mwi obewa. Monai, aa Mashi abena kwimwesha ne obewa pamo Nao. Ke Kayukilo. Aye...Kyo kika, Mashi aichikijile obewa; obewa wamuswa, kabiji Bumi bwaiya mwi obewa. Obe uji na Kayukilo, ao ye Mupashi Wazhila.

<sup>135</sup> Nanchi inge twalomba, twafwainwa kwikalala na Kayukilo kakumwesha na milombelo yetu, monka mo Najikwambila, kabiji pano iketekelai anweba bene kabiji ingijishai Kayukilo ku kisemi kyonse, nobe mu Ijipita, Yeliko, nangwa mu Byubilo 16:31. Twatana kuuba mba Paulo wabuujile mushilikale mwina Loma, amba, “itabilai anweba, ne ba mu nzubo yenu bonse bakapuluka.” Ako Mwikengijishe ku kisemi kyenu. Inge muji na mwaana wabula kupuluka, anweba bikai Kayukilo peulu yanji, ne kwamba mba, “Nkambo Lesa, Namukeba.” Ikala ponkapo. Inge uji na bamaama nangwa mutemenwe walubilamo, bikai koka Kayukilo pe abo, ne kwamba mba, “Nkambo Lesa, Amiwa namukeba.”

<sup>136</sup> Mfumamo, mu byonse byatama bya ntanda, bifume mu nzubo yobe, inengezhai na Kikye. Nsokai tuputula twenu. Tayai matebulu enu a ngyuka. Fumyai mishanga yenu. Tayai kubula luketekelo kabiji ne bitepala byenu mu kyakutayamo ndochi, kobitanwa. Amena. Nanchi anweba mubena kwinengezha. Nanchi kika kyakuuba? Pano ingijishai Kayukilo mu milombelo, na bukamonyi bwakine, lwitabilo lwa kine. Kengijishai Ako, Kengijishai na kuchichika. Ine mwaingijisha Kayukilo, yukaitu mba anweba mwatokeshiwa. “Inge michima yetu yabula kwituzhachisha ne, nanchi tuji na kukabila kwetu.”

<sup>137</sup> Kikulutu anweba bantu mubena kwibyuba bintu byatama, bimye binga byo musakwipuzha Lesa mba emubile kiji kyonse kasa mwayuka mba mwatamisha? Oene mambo kyo tubulatu twaya kulutwe kabiji twabwela kunyuma. Amiwa kechi mbena kwikyaamba amba kozhang’ane ne. Mbena kwamba kikye amba nekyolole, pakuuba mba bintu bikale bulongo. Musa kwikishimika byepi pa buto bwa Sodoma ne Gomola? Wabwela jibiji!

<sup>138</sup> Bipamo ne bamwingilo balekelesha bantu kuuba kiji kyonse, kabiji baikala babula mambo, kabiji babikatu jizhina jabo mu buuku ne kwibatela *kikye*, *akya*, kabiji ne *kikwabo*, bino kasa kiji kyabuvu. Kabiji kyaikala kya kuuba mba lwitabilo ke kintu

kimo kyabula . . . kabiji bimye byavula kechi tuuyuka byokiji ne. Abo, baji na luketekelo, bino kechi lwitabilo ne.

<sup>139</sup> Obewa wafwainwa kubwela, ku, bintu byonse bya wamishiwa ne kutoka. Pano tola Kayukilo kobe, aka ko wayuka mba Yesu Kilishitu mwi obewa, kabiji wi Kingijishe. Inge kintu kimo kyabula kumweka, nishi pajipo kintu kimo kyatama; bwelatu jibiji, uji na kintu kingi mu kuboko kobe. Aye wikilaile. Aye wajinga Iye wikilaile. Kingijishai Kye. Tangai Efisesa 2:12, kimye kimo, inge anweba—inge anweba mwakeba, kabiji mukekitana kokwa.

<sup>140</sup> Monai mu Bahebelu 9:11, ne amo. Paulo waambile mba, “Twingjila Lesa mumi, na byambo byumi.” Kechi kwamba mba Natemwa kuya nobe byaubanga Bahebelu, wesenda kitapisho kyanji, ne kwiya mu mukwakwa, na ng’ombe mulume mukatampe, ne kubika maboko anji pe aye kabiji ne kwimwesha ayemwine, kabiji wasumisha mashi, wabwela kasa abingishiwa. Yehoba wi kikebelenga. Aye wikyubile. Pano kisemi kyalondelapo, kapepo baikala baubisha munyang; mutu mukwabo, waikala waubisha munyang. Kintu kitanshi mwayukatu, kaikala ke kisho kya kisemi.

<sup>141</sup> Abyo pentekositi byo aji kwi atweba, ke kisho kyakisemwa. Twafika, ne kwamba mba, “Bushe awa televizhonyi kechi wajikumwesha byawama nenyi? Nakumya kika kyo baubile ku kipwilo? Nkambo Yesu, bukai . . .” Oo, lusa! Mwamona? Ke kisho kya kise- . . . “Mwayukatu, Naambile mujimi juba jikwabo. Amiwa nalamata ku *kikye*, nangwa *kyonkyo*, mwayukatu. Uuuu.” Oo, ke kisho kya kisemi!

<sup>142</sup> Mwayuka byaambile Lesa nyi? Lesa waambile mba, “Mafuta enu kabiji ne mikoko ilume bibena kunuka mu myona yami. Abyo ibyo, bitapisho byenu byaaluka ke binuka.”

<sup>143</sup> Kabiji nanchi ne bitapisho bya ba Pentekosito, kabiji ne onse madinominesheni achibaika-chibaika kabiji ne byakutwajijila, kabiji ne banabakazhi betu ne banabalume babena kuuba monka mo bobila, musango wa bwina lesa; baimba nyimbo, kabiji untu umo watolauka peulu-ne-panshi mu kimye kicheche; kabiji kyabwela kyapwa, nobe mbekete ya meema yo baichila, inge Kyambo kya Lesa kyaifi kyaambapo kintu kimo. Lukatazho luji kwepi? Bitapisho byenu byatatula kunuka ku meso akwa Yehoba.

<sup>144</sup> Kabiji kyajinga pa kyokakya kimye Isaya po amwekanyikile, kabiji ne kwibabula mba, “Amiwa nkemupa kiyukilo kya myaka ne myaka, kisungu ukemita.” Monai, abyo byobyo kiji. Kechi misango yafwa ne mafunjisho a kipwilo ne, ine; kana byambo byumi, Lesa wa bumi ao wasangulwa kufuma ku bafu, kabiji ne kwikala na bumi mukachi ketu.

<sup>145</sup> Bamo mwiabyo, aby e bipwilo bimo, byaketekela biblye bintu, abo bakana amba kechi kuji kyamba mba Kayukilo ne.

Kyawama, mulunda umo waesekele nkumbuula mba, “Bonkatu batumwa twelufu bo batambwile Mupashi Wazhila. Abyo byo byonka byajingako. Ee.” Oo!

<sup>146</sup> Bino atweba twaketekela Kyambo, twayuka kyapusanako, twayuka mba akye kyo Kyeenyi kyumi. Pano twayuka byepi mba kyo Kyeenyi kyumi kya Kilishitu, Mupashi uji mukachi ketu? Uba bintu bimo byo oba Aye. Abo bo bukamonyi bwa kikye. Kichi kiyukanyikwa kupichila mu kipangwa kipangako. Kabiji inge akyu kichi kitanshi kyaiya kabiji kyanembele Buuku wa Byubilo kunyuma yakyo, kabiji ne bintutu bimo Yesu byo aubilepo, batumwa byo baubile; nanchi inge akyu kichi kyamena jibiji, kyuba kintu kimo. Monai, Bahebelu 13:8 waamba mba Aye ye umotu, oo, ami, kyanshinikisha mba Lesa Wamusangwijile atweba, mwayila Kyambo Kyanji kyalailwe. [Kafwapo bijipo pa tepu ne—Waku.]

<sup>147</sup> Katetesho ka mulaye! Efisesa 4:30 waamba mba, “Kechi mufichishe pa muchima Mupashi Wazhila wakwa Lesa ne, imo mo mwabikijilwe katetesho kufika ne ku juba ja bukuzhi bwenu.” Kechi poso kusangululwa kwalondelapo ne. “Kanatu juba ja bukuzhi bwenu!” Kubatizhiwa mwi Aye, monka mwaila Kolinda Mutanshi 12. Kabiji mwi Aye muji kuyula konse, kabiji bubi kechi buteletwa mwi Aye ne. “Aye wasemwa kwi Lesa kechi ulenga mambo ne. Lukunwa wa Lesa wikala mwi aye, kabiji kechi wakonsha kulenga mambo ne.” Wakonsha byepi aye, Kayukilo kasa kajikoka? Aka Kayukilo ke kiyukilo kyakuuba mba waitabilwa.

<sup>148</sup> Kabiji, kyawama, mwaamba mba, “Amiwa ndengamambo.” Kyawama, nanchi obewa kechi wajinga na Kayukilo ne. Mwamona?

<sup>149</sup> Aka Kayukilo kyo kyamba, kimwesha mba mutengo walipijilwe. Inge Satana waeseka kwikipana kwi obewa... Langulukatu kikye. Inge Satana waeseka kukupa misongo, nangwa waeseka kukupa kintu kimo, wayuka bya kuuba nyi? Mumweeshe Kayukilo kobe. Kine, misongo yakwata Mwinakilishitu. Mumweeshaitu Kayukilo nkobe, pakuuba mba mushinikishe kwi aye amba obewa wi kipe kya Lesa kyapotwa. “Mukanai diabola, kabiji ukemunyema.” Lamai aka Kayukilo pa lwitabilo lubula kusukena mu milaye ya Kyambo Kyanji.

<sup>150</sup> Lesa kimye kimo wapaine kiyukilo kya kankongolo kwikala kayukilo. Amiwa mbena kupezhako. Wapaine kiyukilo kya kankongolo kwikala kayukilo. Amiwa njitu peepi nobe mamineti teeni, kabiji ke mulaini wa milombelo. Aye waikele wakashika ku koka kayukilo. Aye byo ajinga nyi? [Kipwilo kyaamba mba, “Amena.”—Waku.] Aye uba ne pano. Pa yonse ye myaka masauzande, Aye nangwatu jimo, kimye kimo, po akakelwe kwikimwesha ne. Aye wajinga wakashika ku koka kayukilo, witumwesha mba Aye kechi... kabiji kechi

ukankakalwa kunemeka tuyukilo Twanji ne. Amiwa kechi nasakamana ne inge kiji...

<sup>151</sup> Inge Yesu kechi ukeya pa myaka teeni sauzande ne, obewa uji na Kayukilo, Aye ukijitu na munema Nako. Nangwatu bintu bipipulwe byepi, kabiji ne bikwabotu, Aye wafwainwa kupana munema ku koka Kayukilo. Aye waambile mba Ukekyuba. Kijitu bulongo. Aye wituketekela atweba kumwesha Kayukilo Kanji, pa lwitabilo lwitupa-Lesa, ku kyonse kipamo kyabupopweshi bwabubela kyabula kwitabila mu ntanda kabiji ne kyaalo kyonse, aba baketekela mba biyukilo ne byakukumya kechi bilondela baitabila ne. Kabiji ikali ba kine ku kako Kayukilo, kabiji Kimwesha mba malipilo apewa kabiji ne kwitabiwa mambo lusanguko, byo tuji na Bumi bwa Kayukilo mukachi ketu.

<sup>152</sup> Ayo ke Mbila yakonsa, bino ke Bukine. Abyo byobyo tukeba, ke Bukine. Lesa etukwashe kumvwisha Bukine. "Anweba mwayuka Bukine, kabiji ne Bukine bukamulengela kwikalala wakasuluka." Naamba mba Yesu Kilishitu ye umotu keesha, leelo, ne myaka yonse. Naketekela mba Lesa upana Mupashi Wazhila kwikalala Kayukilo, ponkapano, kulupuka kasa kukyangye kwikalako, kwa—kwa Musongwa kulupuka mu kipwilo.

<sup>153</sup> Naketekela mba kuji byavula byabola, kabiji ne bantu babena kwamba mba babijikilenga, baambile mu jimi. Naketekela mu byobyo bintu; bino kechi mwakonsha kukosela mu byobyo ne. Mwakonsha kukosela byepi mu kyokyo, kabiji ne kukana Kyambo? Mwamona?

<sup>154</sup> Aka Kayukilo ke Kyambo kyamweka mwi obewa, kwikalala kyumi Akyo kine. Awo ke Lesa kwikalala wakulumbulula Aye Mwine. Anweba kechi mwafwainwa kwamba mba, "Kyawama, pano, mulumbulule lujimi wami." Abyo kechi ibyo ne. Aye ulumbulula bumi bobe na Kyambo. Inge Aye watola kyambo kyobe, byo uji, kabiji wamwesha Kyambo Kyanji momwa, amwa kechi mukebewa kulumbulula kuji konse ne, kokuji kala. Lesa uba ndumbulwilo Yanji Mwine, kabiji tuji na iye milaye mu juba jetu.

<sup>155</sup> Oo, Dallas, anweba jibumba ja batemwe Benakilishitu, kechi musendwe na bibye bintu leelo, byo mubena kumona nakuzhokoloka, mambo bibena kuya na konaika. Ingijishai aka Kayukilo kimye kyonse, ingijishai aka Kayukilo. Tangai Baibolo. Iyai ku byonse. Kabiji umvwe mupashi wenu uji mwi obewa wabula kwamba mba "amena" ku Kyokyo ne, nanchi wafwainwa kubwela kunyuma, wapipula kyo uji nakyo, na Kayukilo; na kyowabula Nakyo.

<sup>156</sup> Nayuka mba ke bintu byavula bingi kwibyamba mu munte umo. Kabiji ponkapano yafika foo-sate. Ke kimye pano, kabiji

inge twakonsha kufumamo na faivi koloko na mulaini wa milombelo.

<sup>157</sup> Bushe mwaketekela mba Yesu Kilishitu mumi kabiji waikala mu bumfumu leelo nyi? [Kipwilo kyaamba mba, "Amena."—Waku.] Bushe mwaketekela kyo Nemubuula mba kya Bukine nyi? ["Amena."] Ke Kayukilo, kabena kukebewa. Nakonshatu kwamba kya Bukine. Amiwa ng'ambatu byo Mona, byo Ng'umvwa, ne byasololwa kwii amiwa. Kabiji kika kyo Mbena kwambila bibye, bya mubimye teni masauzande ama sauzande, kechi pajipo nangwa kimye kimo pokyakakalwa ne, pano awo wafwainwa kwikalala Lesa. Awa wafwainwa kwikalala Lesa. Kyawama, bushe Lesa wakonsha kupana mwingilo wayewa musango ku muntu wabula kuyuka kyo abena kwambapo ne? ["Ine."] Bushe Aye wakonsha kwii mwesha Ayemwine nobe shayuka, kabiji ne kubwela kumupa byamvwangakana na Kyambo? ["Ine."] Aye muntu ukana Kikye, ye umo wamvwangakana. Kabiji Lesa kechi wiimvwangakanya ne. Lesa Wilumbulula Aye mwine.

<sup>158</sup> Tambulai Kayukilo! Kechi mukokoloke ponka pa kwinunga ku kipwilo kiji kyonse nangwa misango iji yonse ne, nangwa kiji kyonse. Tambulai aka Kayukilo! Kalamai. Kyo kyonkatu kintu Lesa kyo akonsha kuyuka. Inge mwafika ku yewa awala, inge kyafika ku kimye kya lufu lwenu, kyawama kukwachijila aka Kayukilo pe obewa mwine; byo twayuka mba mu juba ja Kwiya Kwanji, alwa lusanguko, Nakonsha kumwesha aka Kayukilo. Kechi kikekala mu uno mubiji ne, ke wabola; pakuuba mu yuwe Mupashi, wakonsha kubula kufwa ne, ke Bumi Bwapeenape, Kayukilo kakonkolokela ponkapa. Kabiji Aye walaile mba, "Amiwa kamusangula jibiji mujuba jikapelako."

<sup>159</sup> Awa Yesu Kilishitu umo uji pano. Aye ye Muluwe. Aye uji... Pano ke Mbila, kabiji Aye ye Muluwe mukumwesha Mbila Yanji. Amiwa kechi ne Muluwe. Aye ye Muluwe, kabiji Aye yo Mbila. Kabiji umvwe uji na mupashi upachika na *Kyokyo*, wafwainwa kwikalala byepi Muluwe wa Mbila? Konkatu Kayukilo ka Kekimwesha. Amen.

<sup>160</sup> Naumvwa bupopweshi. Amiwa kine naumvwa. Naumvwa nobe Nakonsha kutumbuka ponka pano, mambo Nayuka Ye Naketekela, kabiji Amiwa namona bumi bwami kuyukanyikwa Nanji mu lusanguko Lwanji. Kyeenyi Kyanji kiji muno. Kiswayi, balunda, nasashijila kyuubai, mu muchima wenu.

<sup>161</sup> Nayuka mba atweba bonse twaiya kuno ku kitapisho na kulomba. Awa ke mulanguluko wakala wa ba Methodist. Abo kechi baubile kyokyo mu Baibolo ne. Aye Baibolo waamba mba, "Mo bavujila baitabijile babatizhiwe." Abyo ibyo. Kechi kujipo kintu kya kwita bantu ku kitapisho mu Baibolo ne. Akyo ke kintu kimo kyo twanungako, akyo kijitu bulongo. Kyonse Lesa kyo akonsha kupesha, kijitu bulongo.

<sup>162</sup> Nobe byo bashinga manyi byakumvwala. Kechi kwajingapo kintu kyayewa musango mu Baibolo ne. “Basendele kufuma ku mubiji wakwa Paulo tutambala ne ma empuloni.”

<sup>163</sup> Bino mujishinda jiji jonse jo ukeba kwikyubila, kijitu bulongo, mu kipona kyenu, pa kitapisho, konse ko kiji. Kintutu kimo, mweshai Konka, Kayukilo kwi anweba. Pano obwe mwine wikeketa, kabiji ne kumona musango ka wa bumi bujiko, monai kana Kameshiwa kala nangwa ne. Inge kechi Kaubiwa ne, nanchi tula kyonse kyo uji nakyo, ku lubaji, ne kubwela, poso Kayukilo kamweshiwa.

<sup>164</sup> Twayai tulombe. Taata Wamwiulu, kape Na—Na—Naamba bingi lubilo, bino, Nkambo, musumali wakonsha kukwata byepi kanatu wamupopa? Nalomba, Taata, amba kyafwainwa kwikalala kyapopwa mu michima ya bantu, pakuuba mba bamone amba kechi kintu kyawama ne. Kechi Amiwa mbena kweseka kumonapo kipamo kimo, nangwa kisemi kimo, kabungwe kabupopweshi bwabubela, muntu umo, nangwa amiwa mwine, nangwa muntu mukwabo. Ke Yesu Kilishitu. “Nakonsha kubika pamo abyo byonse bipamo pamo,” biji sikisi bya wanu na afu wa dazeni, mwayila Kyambo Kyenu. “Pite inabo wakala,” Baibolo mu Lumwekesho 17, “wajinga inanja bonse ba pite.” Kabiji kechi bakonsha kwikalala mwanamulume ne. Bajinga ba pite, kabiji bonse baile pa mwanya wa bya muntanda. Kabiji twamona mba kyaubiwa, ba Pentekosito ne bonsetu.

<sup>165</sup> Bino, Yesu, Anweba mukijitu Yesu. Kechi mwibaleke bateleke ku mbila ya kipwilo ne; pakuuba Mbila ya Kilishitu, Kyambo. Lekai Anweba mwimweshe Anweba bene, Nkambo, leelo, na baitabila. Bukai bonse bakolwa. Tulekelaiko mambo etu, Nkambo. Na—Nalomba, nobe kalume Wenu, napowela ndekelaiko bubi bwami, kabiji ne kulekela bubi bwa babo bantu. Naketekela, Nkambo. Umo umo mwi abo wakwasha mu byabupe kwakubula ne luzhinauko ne, kulipila ku—ku bishimikwa, kabiji bataya mali abo, kabiji baji—baji—bauba bintu byonse, Nkambo. Anweba Lesa, Nalomba mba kechi kusakwikalapo nangwa umo wa mwiabo kimupite ne, Nkambo. Lekai bonsetu!

<sup>166</sup> Na—Nauba kyokyo na bukishika, kabiji nangwa byonkabyo, Nkambo, Anweba mwafwainwa kwikalala nang’umvwino yawama. Twayuka, kolola ke butemwe. Butemwe bolola. Kabiji Amiwa nalomba. Ao oene mambo Anweba kyo molwela bantu Benu, ke mambo a kuba mba mwibatemwa bantu Benu, kabiji bubi bonse bwafwainwa kupewa mukumbu.

<sup>167</sup> Kabiji, Taata, Nalomba mba Anweba musakwitulekelako mambo etu, byo tubena kwisolola. Twaya mungi kwalepesha, Nkambo. Nayukanyikwa na babo bantu ba, ki Pentekosito, Nkambo. Amiwa—Amiwa ne umo wa mwiabo. Kabiji Na—Nalomba, Lesa, namba Anweba mwitulekeleko atweba bonse. Kabiji tolai bambo ba mubabo batangi ne kwibalulula, kabiji—

kabiji balekai bataleko ku Kalvali jimotu, kabiji bakalubako byo bafwainwa kwikala, mukulumpe wa kipwilo nangwa bbishop, nangwa musango yense mo kyaikela, kabiji bayuke mba kechi twi bakatampe mu bubwe Bufumu ne. Atweba bonse twi baana bakwa Lesa. Nalomba mba Anweba musakwitukwasha pakino kimye. Imweshai Anweba bene mukachi ketu, leelo. Twalomba mu Jizhina ja Yesu Kilishitu. Amena.

<sup>168</sup> Pano saka tukyangye kutatula mulaini wa milombelo, kape pajipo muntu umo muno ukyangye kwiyako kuno ne. Amiwa kechi nayuka ne kana yobe ng'anyi, bino Lesa wakuyuka. Inge Nabulang'ana kya Bukine, lekai Lesa ekimweshe, kana kya Bukine nangwa ne, ako ko kwikishinikisha. Inge Aye wasanguka kufuma mubafu, Aye ujitu pamo keesha, leelo, ne myaka yonse. Aye waambile mu Yoano 14:12, "Aye waitabila," kechi yewa kitabila mbijinga ne. "Aye waitabila mwi Amiwa, mingilo Yonguba ne aye ukeyuba." Abyo ibyo nyi?

<sup>169</sup> Muntu umo waambile mba, "Ne yakilapo mu keyuba." Abyo ibyo. Waambile mba, "Kyawama, tusapwila Mamboawama, akilapo."

<sup>170</sup> Anweba kuubatu bintu Aye byo aubilepo, akyo kikashinikisha kwi amiwa, mwamona, pano po tusakwamba pa byakilapo. Nakonsha kwimumwesha bintu bikatampe Aye byo abena kuuba pakino kimye kukila byo Aubile kimye kyo Ajinga panopantanda, kabiji aka kechi kusapwilatu Mamboawama konka ne, nangwa byonkabyo; aby ke mubiyukilo ne byakukumya. Kechi tuji na kimye kyabyobyo ne. Ketekelaitu. Kabiji lekai Lesa wa Mwiulu, Ao wasangwile Yesu Kilishitu kufuma mubafu, kabiji wamupana Aye kwikala mumi muno, kwi atweba, pakupitapo myaka tuusauzande, mweshai iye Mbila, amba Yaoloka. Aka Kayukilo kafwainwa kwingijishiwa.

<sup>171</sup> Pano, anweba muji na misongo ne makatazho, lombai, ambai na bukishika, "Nkambo, Naketekela mba Anweba yenu 'Ng'anga Mukatampe wakonsha kukwatwa ku bya lumanamo byetu.' Kabiji twabulwa ku yuwe wamwingilo papo, amba Anweba muji netu, ponkapano, nanchi Nasaka mba Anweba mwikale ne atweba kabiji ne kwiyukisha Anweba bene." Pano lombai, anweba bonsetu.

<sup>172</sup> Pano kiji kwi Lesa kwambapo kintu kimo. Kimye ka! Oo, ami! Nakeba mba anweba inge mwayukapo kintu kimo, byo mumvwa inge Akya kyaiya, ntanda yonse iji kulubaji lobe. Amena. Kafwako diabola ukobapo kintu kimo ne, aye ke kilengwa kyashindwa. Nkambo Yami uji pano. Byonse biji mu maboko etu. Amena.

Nasashijila mwikale bakhindama. Kwendane. Ikalaitu nzoo.

<sup>173</sup> Anweba muji mu bipona byamawilo, ne bintu bikwabo, kechi mulanguluke mba bukwasho kafwako ne. Ketekelai. Aweba—anweba, mwapita mu milaini ya milombelo, kabiji

kyakakekwa ne kukakalwa. Kechi kyajinga wamwingilo wimulombejile ne, kyakakelwe. Ke lwitabilo lobe, kabiji watatula kulanguluka mba kafwako kisakubiwa ne. Anweba mwaketekela.

<sup>174</sup> Akye, akye Kyeya kuno, pa inetu mucheche wachiluluka waikala kunyuma kukwe, waimana na maboko anji asutulwa peulu *bibye*. Ee. Obewa ubena kulomba. Ee. Anweba mwaketekela mba amiwa ne ngauzhi Wanji, nangwa kalume Wanji nyi? Amiwa kechi nakonsha kwamba kyokyo ne, mambo kitutwisha bingi bantu. Muji na bawama . . .

<sup>175</sup> Awe ke mwanamulume utoka, mwanamukazhi wachiluluka, nobe byonka byakyajinga kwi Nkambo kabiji ne mwanamukazhi pa mushima, ke mikoka ibiji. Aye wibayukishe mba kechi pajipo lupusano mu mitundu ne. Mishobo yetu kechi ijipo na kintu kimo ne. Atweba bonse . . . Twakonsha kupipuzhanya kwa mashi. Lesa witulengele, kufuma ku mashi amo, mikoka yonse.

<sup>176</sup> Ubewa mutwe ubena kukola, mutwe ubena kukola bingi. Kabiji uji na kinemenezhi ku muchima obe, ke kya yewa mwaana. Kabiji obewa . . . Kya kumanyika. [Nyenga waamba mba, “Amena.”—Waku.] Abyo kine ibyo. Bushe kyakine nyi? [“Amena.”] Abyo ibyo.

<sup>177</sup> Awe inetu waikala popa kufuma popa, aye kyamweka nobe ubena wayukanyikwa kwi obewa, ke bainobe. [Aye nyenga waamba mba, “Amena.”—Waku.] Abyo ibyo. [“Lesa Atotwe!”] Kabiji baji na kintu kimo kyatama kwi abo.

<sup>178</sup> Mwaketekela nyi, inetu? [Bainanji baamba mba, “Amena.”—Waku.] Waswa nyi? Lukatazho lobe lubena kukola ku lubaji lobe. Abyo ibyo. Ke ku lubaji lwa kuboko kwa kilujo kubena kukola. Abyo ibyo nyi? Sutulaiko kuboko kwenu, inge abyo ibyo. Kechi kikakukatazhapo jibiji ne. Anweba mwaketekela mba inge Lesa wakonsha nkumbula byo muji? Mrs. Lowell. [“Amena.”] Ibyo. [“Amena.”] Kijitu bulongo, yanga mu jishinda jobe, aye Nkambo Yesu wakupa kukabila nkobe.

<sup>179</sup> Ponka pa mpelo ya popo kiji mukwabo inetu waikala mucheche wachiluluka, ubena kutala, akya kiji—kiji nobe kyakumwabanyapo mu bipimvwa. Aye ubena nkutala. Aye wikitetekela. Akya, kechi mwikimona akya Kintu kiji kulubaji lwanji? Ubena kumanama na lukatazho lwa jifyo. Abyo ibyo. Pano kyonse kyapwa; Aye wakubuka. Amen.

<sup>180</sup> Kika kyo wabujila kuketekela? “Inge wakonsha kuketekela, bintu byonse byakonsheka kubiwa.” Bushe mwaketekela kyokyo nyi? [Kipwilo kyaamba mba, “Amena.”—Waku.] Muno ke . . . Talai pa bantu bachiluluka! Lwitabilo lobe luji kwepi, balunda batoka?

<sup>181</sup> Apo paji inetu wachiluluka waikala papo, ubena nkutala, ke inetu wabaya bingi. Uji na lukatazho na jinungo janji. Kabiji aye uji na lukatazho lukwabo, uji na lukatazho lwa muchima.

Ee. Kabiji uji wabula ngovu, kwenda lubilo ne bikwatu bya byobya, kukijishamo inge ubena kweseka kulala pansi, kutata. Mwamona? Akyo kyamwekele bufuku bwapita. Vulukai, Amiwa kechi mbena kutanga milanguluko yobe ne, bino Nayuka byo walombelengapo. Anweba mwakebelenga kwitwa bibye, leelo, kabiji Aye wakukumbula. Bino anweba kechi mwakonsha kwimana ne, mambo muji na kikola kya mashimba. Abyo ibyo. Kabiji pano, kintu kikwabo, uji na lukatazho lwa munda, akyo ke kitumbwa munda. Akyo kyakine. Pano mwaketekela mba amiwa ne ngauzhi Wanji nyi? Amiwa nsakwiyamba kikye, nangwa byonkabyo. Ketekelai, kabiji musa kwikalatu bulongo.

<sup>182</sup> Pano nga lukatazho *lobe* lwa munda? Bushe mwaketekela mba Lesa usa kubuka munda mobe nyi, waikala popa, ne obewa? Mwikiketekela nyi? Kijitu bulongo, nanchi mwakonsha kutambula lubuko lwenu lwa munda. Amena.

<sup>183</sup> Mubena kukeba kuleka kupepa fwaka, kokwa, inetu? Mwaketekela mba Lesa usa kwimulekesha kupepa nyi? Mwaeseka kimye kyabaya bingi. Uji na lukatazho lwa munda, ne obe; wajikwesekanga kuleka fwaka. Akyo byo kibena kulengela lukatazho lwa munda. Mwakonsha kwipipana nyi? Amiwa ne bifumya kwi obewa, mu Jizhina ja Yesu Kilishitu, mambo a lwitabilo lobe lwa kumukwata Aye.

Nakukambizha obewa kuketekela Lesa!

<sup>184</sup> Apo paji mwanamukazhi mucheche mubiji ubena kulombelela... mutemwe wanji uji mu kipatela, ubena kufwa, na kaasa. Kiji bulongo. Ke ba mwisho. Abyo ibyo. Anweba muji ba... Anweba mwi bakazhi ba wamwingilo. Mwaketekela na muchima wenu yense, mwanamulume usa kwikalatu bulongo.

<sup>185</sup> Nakukambizha obewa mba uketekela Lesa! Kyo kika? Ke kuyukanyikwa kwa Yesu Kilishitu. Mwaamba mba, "Nga Kilishitu ye ng'anyi?"

<sup>186</sup> Aye kyo Kyambo. "Muntendekelo mwajinga Kyambo, akya Kyambo kyajinga na Lesa. Kabiji ne Kyambo kya alukile ke muntu kabiji waikelenga muno mwetu." "Akyo Kyambo kyatwisha kukila mapoko atwa-kubiji, upima milanguluko ne kulondalonda mwaya kebelo ya muchima." Kechi mwamona mba Kyambo kyaiya mukachi ketu mu moba akumpelo nenyi? Ke Mupashi Wazhila ubena kutola Kyambo kya Lesa ne kuyukanyisha Yesu Kilishitu, awo ye Kayukilo. Amena. Mwaketekela nyi? [Kipwilo kyaamba mba, "Amena."—Waku.]

<sup>187</sup> Baanga baji na bitupa bya milombelo? Lekai bonse *baji* kululwe lubaji na bitupa bya milombelo, imanai mu yuwe mulaini *papo*. Imanaitu, bonse baji kulolo lubaji, alo lubaji imanai kukwe mwabula bipona. Ine, kana kulubaji lwa kuboko-lwa kilujo, ne musashijila, ponkapotu. Ba asha, imanai pa bifulo byenu. Pano inge bapwisha, lekai bakwabo bemane, panyuma

ya kupwisha, ke bakwabo ku lubaji lukwabo. Pano lekai muntu yense ekale na munema.

<sup>188</sup> Aye Mupashi Wazhila wakusenda kutangijila mbung'eno, nanchi kwajinga byavula byaambiwa ne kubiwa mu kushiniikisha. Baanga baketekela mba Aye uji muno? Baanga baketekela mba aka ko Kayukilo? Baanga baketekela mba Kyambo? [Kipwilo kyatatala kusangalala—Waku.] Talai, baanga bayuka mba Buuku wa Bahebelu waamba kyokyo, mba, "Akyo Kyambo kya Lesa kipima milanguluko iji mu muchima"? Baanga bayuka kyokyo? Baanga bayuka mba ao oene mambo Yesu kyo apimijilenga milanguluko mu muchima wabo, ke mambo Aye wajinga Kyambo? Baanga baketekela kyokyo? Baanga baketekela mba akyo kyo kyajinga na bangauzhi? Bajinga ko kwaishile Kyambo kwi abo. Pano inge Kyambo kyabwela kwi atweba, kechi Kyakonsha kuuba kintu kimo nenyi? Nanchi pano nga Kyambo kiyukanyikisha Kyambo, kyaikala kyatama ku Kyambo? Oo, lusat! Munema!

<sup>189</sup> Anweba, awe inetu waikala papo, uji na kintu kimo pa muchima wanji, ne aye. Naji kwalukatu ne kimona. Kechi yenu ba Mrs. Grant ne? Amiwa kechi nayukile kyokyo ne. Bino anweba mwi ba Mrs. Grant, mambo Namona mba muji najo. Anweba muji na lubazhibazhi lubena kwimukatazha. Anweba muji, mwanenu wamulume uji kintu kikwabo...mashi anji, nobe, ubena kunonkola. Ne mukambizha kwikiketekela! Amen. Aye ye Nkambo wa misango yonse. Aye ye Nkambo wa lufu.

Twayai tulombe.

<sup>190</sup> Nkambo Yesu, mu kimye Kyeenyi Kyenu kibena kwitushinga manyi, muno mu kishimikwa, kabiji twayuka mba awe ke Mupshi Wazhila, Nalomba, Nkambo, amba Anweba musakubuka muntu yense ukamvwala tutwe tutambala.

<sup>191</sup> Kimye kimo, twafunjishiwa mu Baibolo, mba bantu Benu, byo bajinga mu ndonda ya mwingilo, ba aubikilenga pa Kalunga Kachila, kabiji kalunga kakilang'anya mujishinda jabo, mu jishinda jabo ja kuya mu ntanda ya mulaye. Lesa watajile pansi kupita mu Mumbulungwa wa Mujilo, na meso azhingila, kabiji ne kalunga kaumvwine moyo, ne kubwela panyuma, kabiji Isalela watwajijiletu kuya ku ntanda ya mulaye, monka mu ndonda ya mwingilo.

<sup>192</sup> Anweba Nkambo Lesa, lekai meso Enu antale kupita mu Mashi akwa Yesu Kilishitu, kuya nu kako Kayukilo papo ko tubena kukwata pa tutwe tutambala leelo. Kabiji muntu yense ukamvwala bibye, lekai misongo ikomvwe moyo, lekai ibwele panyuma kabiji lekai bantu Benu babuke kuya ku bututulu bwa mubiji bwawama. "Milombelo ya Iwitabilo ikapulusha bakolwa." Mu Jizhina ja Yesu Kilishitu, lekai kikale byonkabyo. Amen.

<sup>193</sup> Baanga baketekela basapwishi baki Methodist baji muno, basapwishi baku Baptist, basapwishi baku Presbytery, basapwishi ba ku Baptist, bena Luther, nangwa ba Pentekosito? Baanga ba mwianweba baketekela mba Akye kya Bukine? Iyai kuno nanchi mwimane pa kimye kyo tubena kulombelela bakolwa. Iyai kuno, anweba bonse basapwishi mwaketekela.

<sup>194</sup> Kijitu bulongo, kechi ibyo nenyi? Mulongo Grant, akyo kijitu bulongo? [Mulongo Grant waamba mba, “Kine.”—Waku.] Uu-uu.

<sup>195</sup> Iya kuno, mulongo. Mulongo Grant uji na mwiningilo wa kulombelela bakolwa. Ke mwanamulume waimana, muntu wawama, muntu Lesa ye omvwa ne kukumbula milombelo, Mulongo Grant. Amiwa nji nalusekelo pa kubika kuboko kwami pe aye leelo ne kwamba kyokyo, kabiji mulongo wami. Pano usakwikala pamo ne amiwa na kulombelela.

<sup>196</sup> Inge mwaiya kupita muyuwe mulaini, kijitu pamo nobe mubena kwiya munshi ya musalabo. Balongo, lengai milaini ibiji papo, ponkapo. Lengai milaini ibiji; bambo papo peulu, bambo papo pansi.

<sup>197</sup> Mulongo Roy Borders, kwepi ko uji? Mulongo Roy Borders, Nalangulukile mba uji muno. [Muntu umo waamba mba, “Aye usakubwela jibiji.”—Waku.]

<sup>198</sup> Talai kuno, ku bamwingilo, mwakonsha nyi! Tala popa. Akyo kyandengela amiwa kumwva bulongo, balongo. Bamwingilo ba musalabo, bantu baimana kuno na kwimwesha abo bene na Mbila. Kika kyakonsha kumweka?

<sup>199</sup> Pano, talai, kechi mwikibike pa bamingilo ponka ne. Baiya na kwimwesha abo bene. Inge mwapita papo, imwesh-... lamai Kayukilo kumeso enu “Nkambo Yesu, Amiwa nasolola mambo ami. Mu kubwezhapo, Anweba mwapa lubatizhilo lwa Mupashi Wazhila. Amiwa ne kipe kyo bapota. Bubi, misongo nangwa kintu kimo kyakonsha kukwata pa bibye ne. Amiwa mbena kwendatu bulongo.” Kwachijilai kyokyo, oo, kumeso enu, kabiji ne kupita muno, kabiji Lesa usa kwi mubuka anweba kabiji musa kulupuka muno na lusekelo, kya lusekelo, kabiji ikalaitu bulongo. Mwikiketekela nyi? [Kipwilo kyaamba mba, “Amena.”—Waku.]

<sup>200</sup> Pano muntu yense uji muno, twayai tukunyike mitwe yetu, balongo, mu kyapamo. Atweba kechi twayuka kisakumweka ne. Atweba kechi twayuka ne. Kechi kujipo ene mambo muntu wakolwa kulupuka mu kino kishimikwa mute umo ne. Kwachijilai ako Kayukilo mu muchima wenu, pitai monka mu yuwe mulaini wa milombelo, paji ba mwiningilo, abo bepana bumi bwabo ku—ku mwiningilo, basakwimana papo, na kubika maboko abo pe anweba mu kimye kyo mubena kupita papo.

Mwaamba mba, “Kika kyo ubila kyokyo, Mulongo Branham?”

<sup>201</sup> Nasaka anweba, muntu yense, kuyuka kyokyo... Amiwa kechi ne ubuka ne. Abo bantu baji na sambu ya kulombela bakolwa byonka bijitu muntu yense. Kwamba patota, Naketekela mba Lesa wakonsha ku kumbula milombelo yabo kasa Akyangye yami. Amiwa nankoka kabiji napwamo, ne bintu byonse. Na—Naketekela mba Aye wakonsha kukumbula milombelo yabo. Kabiji papo baimana mukachi kakyo, pakuuba mba bemweshe abo bene, kechi bajipo na buvu kutola bifulo byaboo ne. Nasachila muntu wamusango yuwe.

<sup>202</sup> Pano, balongo, Nayuka ng'umvwino yenu. Amiwa, Amiwa ne umo ne anweba. Amiwa yami umo watandabwile kyandaluba kyami pamo ne anweba, kuno ku Texas, nakweseka kukwata masabi onse Lesa o atongwejile jimo ku Bumi, kokwa. Amiwa mbena kwingila mo nakonsheshe. Amiwa nji nenu, aduleendi paseti. Kimye kimo Napanta kabiji ne kwamba pa kabungwe ne bintu bikwabo. Akyo kechi kyalumbulula mba Amiwa na kupata ne, mulongo wami. Amiwa Napatako ndonda ilengela kwitwabaya kwikala balongo, mambotu a lufunjisho lumo lwa bupopweshi. Atweba twi balongo na lubatizhilo lwa Mupashi Wazhila. Twakwachijilatu Kayukilo kamo. Atweba twatambula Mashi amo, nanchi twayai tuketekele kyokyo. Twakonsha kusambakeena Kokwa (kechi kyakonsheka nenyi?), balongo, atweba bonse tuji mushi ya Mashi.

<sup>203</sup> Bino, Naikajikilwe mu Baptist. Kapepo wi Methodist, nangwa waki Lutheran, nangwa waki Presbysterian, Pentekosito, Bu umo, Bu bubiji, Bu busatu, nangwa kiji kyonse kyo mujinakyo, Kipwilo kya Lesa, nangwatu kikale kyamusango ka. Akyo kechi kijipo na lupusano ne. Atweba kechi twakonsha kwitabazhanya mu tubitu tucheche ne, twayai tulubeko pakikye nanchi.

<sup>204</sup> Kintu kimo kyo twakonsha kuswishang'ana, kuuba mba Yesu Kilishitu Mupulushi wetu wafwile na mambo etu, wasangukile jibiji kabiji ne kwitupa Kayukilo. Twaimana pano na milombelo yetu, twakwachijila pa baabo bakolwa balongo ne banyenga basakupita papo pa mulaini. Amiwa nsakwikiketekela na muchima wami yense.

<sup>205</sup> Amiwa namonapo kintu kimo kyamweka ponkapotu. Amena. Nayuka anweba mulanguluka mba Nakonya, bino Mbena kumvwa kukonya kwawama bulongo. Amiwa naketekela mba Nakonsha kwikalatu muyuwe musango. Ee, mwane. Naumvwatu bulongo mujije jishinda.

Twayai tulombe.

<sup>206</sup> Nkambo Yesu, Amiwa mbena kufumako kuno kupulatifomu, kuya papo, na kwimwesha amiwa mwine na balongo. Mbena kwimwesha amiwa mwine ne abo, byo tubena kukwata Tuyukilo twetu mu maboko etu, kabiji ne mu michima yetu. Byo tubena kukokela mukambizho Wenu, “ne kubika maboko pa bakolwa,

kabiji basakukosa.” Lekai muntu yense abena kupita mumwe, bamweshe Kayukilo kabo, amba batambula Mupashi Wazhila, amba ke mwaana wa Lesa wasemwa-jibiji, amba bekiketekela na muchima wabo yense. Kabiji byo basakupitanga mukachi, lekai bafinge kyokya kikola ne kumanama kwa mibiji yabo. Kabiji lekai balupuke muno kasa babena kusangalala, ne kuyuka mba lwitabilo lwabo lwibalengela kukosa.

<sup>207</sup> Kabiji, Nkambo Lesa, byo twakwikajika, Lulayang’ano Lwakala, maboko etu pa kitapisho, kwimwesha atweba bene na kitapisho, twateteka maboko etu pe Yesu kabiji ne kwimwesha atweba bene Nanji. Aye wabikile maboko Anji pe atweba pakino kimye mu mwingsilo, kasa abena kwimwesha Ayemwine ne atweba, kupichila mu biyukilo ne bya kukumya. Kabiji twabikwa maboko etu pa bakolwa, na kwimwesha nabo atweba bene na bene, na lwitabilo lwetu lwakwatakana nabo. Misongo yafwainwa kuya, kabiji lekai kyubiwe mu Jizhina ja Yesu Kilishitu, byo tubena kwenda kuya popa na kwikitambula.

Lekai kipwilo kyonse kilombe.

<sup>208</sup> Roy nangwa muntu umo eye kuno emane ku maikolofoni, kabiji ne malaini ekale a oloka.

<sup>209</sup> Talai, byo mubena kupita papo, iyai kasa mwaketekela, iyai kasa mulomba. Tusa kubikapo maboko pa bakolwa. Iyaingatu. Lombai. Inge mwapita pa yuwe mulaini wa bamwingilo, inge ubena kwendela ku mikombo, bitule panshi kabiji wende ufumepo. Inge uji na kaasa, misongo, amba mba, “Badokotala bauba byonse byo bakonsha kuuba, aye wauba byonse byo akonsha kuuba, kabiji waambile mba Nafwainwa kufwa. Amiwa kechi mbena kufwa ne. Akano ke Kayukilo kami, Nkambo. Anweba mwandaya sikisite ne teni. Amiwa mbena kupita muno, na kwikyuba.” Monai, ubai kyokyo. Mwakonsha kwikyuba nyi? [Kipwilo kyaamba mba, “Amena.”—Waku.] Mu Jizhina ja Yesu, lekai kikale byonkabyo. Amen.

<sup>210</sup> Kijitu bulongo, lekai yuwe mulaini apitenga. [Mulongo Branham ne bamingilo ke balombele bakolwa, nobe mulongo byo abena kutangijila kipwilo na kwimba *Ketekelaitu* ne nyimbo ikwabo. Kafwapo bijipo pa tepu ne—Waku.]

Naketekela!

Luzhinauko lwami lonse lwazhikwa mu Nsulo.

<sup>211</sup> Mwikiketekela nyi? [Kipwilo kyaamba mba, “Amena.”—Waku.] Amen. Oo, kechi Aye wawama nenyi? [“Amena.”] Bamo bajinga pa bilalo ne pa mibanda, bajikwimana baenda balupuka; bebisatu byalala ponka pa, ne kwenda kuya. Oo, ke muntu yense wakonsha kutambula lubuko pano, usa kwikiketekela. Mwikiketekela nyi? [“Amena.”]

<sup>212</sup> Twayai tupe pa kusawila, *Namutemwa Aye*, obewa wakonsha, nyenga; awa lwimbo wakala, “*Namutemwa Aye, Namutemwa Aye mambo...*”? Twayai tusutule mawi etu,

kabiji ne maboko etu, michima yetu, kwi Lesa, ne kwimba, “Nanutemwa Aye, Namutemwa Aye, mambo Ye mutanshi kutemwa.” Muntu yense pano.

Nanutemwa Aye, Namutema Aye  
 Mambo Aye ye mutanshi kutemwa  
 Kabiji wapotele lupulukilo lwami  
 Pa Kalv- . . .

<sup>213</sup> Inetu, waimana kufuma mu kipona kya mawilo, ubena kwenda papo na bukwasho bwa banabalume babiji. “Na . . .” Twayai tusonkone maboko etu kwi Lesa, “Nanutemwa Aye!”

Nanutemwa Aye  
 Mambo Aye ye mutanshi kutemwa  
 Kabiji wapotele lupulukilo lwami  
 Pa Kalvali pa . . .

Twayai tumutumbijke Aye ponkapano, muntu yense!

<sup>214</sup> Lukumo kwi Lesa! Byo twimusachila Anweba, Nkambo Yesu, pa buwame Bwenu, Kyeenyi Kyenu. Oo, twimusachila Anweba pa mambo a Kayukilo, Nkambo. Twapuluka ne kuyulwa na Mupashi, Mupashi Wazhila kasa abena kupana bulume ku mibiji yetu. Byo twimusachila Anweba pa kikye, Taata! Oo, mu Jizhina ja Yesu twimusachila Anweba. Amena. Amena.

<sup>215</sup> Muntu yense imunai, ne kwaamba mba, “Jitotwe ja Nkambo!” Imuna kuboko kwa mukwenu, ne kwamba mba, “Atotwe Nkambo! Atotwe Nkambo!” (. . . ? . . .) Kijitu bulongo, pano, bonse pamo ne jikwabo:

Nanutemwa Aye,  
 Maboko asutulwe peulu, michima isutulwe peulu.  
 Na . . .

Kimweshatu kufuma mu muchima wenu.

Mambo Ye mutanshi kutemwa (Usa  
 kupalang’anya nyi?)  
 Kabiji wapotele lupulukilo lwami  
 Pa Kalvali pa kichi.

<sup>216</sup> Pano twayai tukunyike mitwe yetu na munema, byo Mbena kupana mpwijilo pano kwi Mulongo Grant apalang’anye bonse; ke kusachilatu yense mwi anweba. Patanshi, ke kusachila Nkambo pa buwame Bwanji, lusa Lwanji, kabiji ne luketekelo lo Naketekela mba twasha mu michima yenu, amba kechi tuji muno bunke ne. Kapiteni Wetu Mukatampe uji mukachi ketu. Ne kubijika kwa Mfumu kuji mu kambi. Kabiji twimusachila Nkambo, pa kumona bulume Bwanji bukatampe ne lusa Lwanji lukatampe. Kabiji pano twayai tukunyike mitwe yetu namunema. Mulongo Grant.



*KAYUKILO* KDE64-0308  
(The Token)

Ino Mbila na Mulongo William Marrion Branham, yalupwilwe patanshi mu Kizungu pa Mulungu mute, 8 Kisaka, 1964, pa Soul's Harbor Temple ku Dallas, Texas, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2022 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)